

Ebedeoidi inänite cadota ante nāni yewæmongainta

Wængonguī beyæ tōmengä Wengä pönö apænegacäimpa

¹ Wængonguī wēenēñedē wantæ wantæ iñö apæned-inque wantæ iñö wadö bai cædinque wantæ iñö wadö bai cædinque tōmengä beyæ nē apænedāni inänite tæmpo pönö apænegä ēñengadānimpa. Ēñēninque tōmēnāni wæætē adodö ante mönö mæmæidi inänite tæmpo apænegadānimpa.

² Nōwo guiquēnē mäninö ante Wængonguī dodāni inänite nänö apænegaiönæ idæwaa bayonte tōmengä apænegä ēñēninque tōmengä Wengä wæætē mönö imonte pönö apænegacäimpa. Wēenē pōni inguipoga dæ ii emönæ dæ añonte Wæmpocä tōmengä Wengä ingante, Badöe, angä ēñente cæyongä tōmengä nänö cædö beyæ Wæmpocä tōmancoo badongacäimpa. Mänömai beyæ nē badongä iñongante Mæmpo Wængonguī wæætē, Tōmancoo nē ænguingä iñömö botö Wengä adocanque nē ænguingä ingampa ämopa, angacäimpa.

³ Mæmpocä nē tæi emönongä inte ñäö emongä iñongä tōmengä Wengä iñömö adobai nē tæi emönongä inte ñäö emongä ingampa. Īninque, Wængonguī Wengä nō pōni entawēninque nänö quēwengainö bai Mæmpocä iñömö edæ adobai pōni entawēnongä inte edæ nöingä cæte quēwengä ingampa, ante mönö edonque ēñengæimpa. Īnguipo incæ ii emönæ incæ a ongoncoo incæ awēmö iñömö ongoncoo incæ tōmengä Wengä adocä tæi piñænte nänö angäinö beyænque tōmancoo edæ ñowo ganca cōwē ongoncoo incoopa. Ayæ nämä wepæ godonte

wæninque adocä iñömö wænæ wænæ mönö cæpāmo ante ñä mēnongagacäimpa. Mänömaï nē ñä mēnongaingä inongä inte tömengä do æidinque Wængongui nē tæi emongä tömēmängä inö tæ contadinque ongongampa.

Tömengä ñænængä iñongä anquedoidi pönömenque inäni

⁴ Mänömaï æi contadinque tömengä nē ñænængä iñongante Wængongui iñömö, Bitö emöwo bitö cōwē ænguēnengaiwo, ante pemongacäimpa. Wængongui anquedoidi guiquēnē wii adobaï ñænænäni iñönänite Wængongui tömēnāni inänite adobaï ante pemönāmaï ingacäimpa. ⁵ Edæ anquedoidi iñönänite æcāmenque ingante Wængongui dicæ,

“Botö Wēmi inömi imipa.

Ñöwoönæ bitö Mæmpobo babopa,”

Ante angantawogaa. Ayæ adobaï,

“Botö tömengä Mæmpobo incæboimpa.

İninqe tömengä botö Wengä incæcäimpa,” ante anquedo ingante änāmaï ingacäimpa.

⁶ Wæætē tömengä Wengä Tānocä iñongante inguipoga da pönöninque Wængongui,

“Botö anquedoidi tömänäni iingä önöwa inö ædæ wææninqe, Bitö Wængongui Wēmi imidö anguēnē, ante watapæ apænecædänimpa,” ante apænecæcäimpa.

⁷ Ayæ wæætē anquedoidi inänitedö ante apænedinque,

“Tömengä godö cæcä ate tömengä anquedoidi iñömö woboyæ nanguï pæmä bai quingæ pöni cæcædänimpa.

Ayæ tömengä godö cæcä ate tömengä beyæ nē waa cædäni iñömö gonga bæcoguēnēwate bai nanguï cæcædänimpa.”

⁸ Ante apænedinque tömengä Wengä ingante guiquēnē Wængongui incæ iimaï angacäimpa.

“Bitö nē Wængonguī inōmi inte ēñēmi. Awēnē Odeye badinque Awēnē containpaa tǎe contagāimi inte bitö ñimpo cǎdāmaī inte cōwē Awēnē Odeyebi inōmi inte ongoncæbiimpa.

Īninqe Awēnē Odeyebi inōmi inte bitö nempo quēwēnāni inānite nō pōnī cǎete aadinque yaēmē tōēmē pōnī nǎæante baī nē āmi incæbiimpa.

⁹ Nē Wængonguīmo inōmo inte botö iñōmō bitö Awēnē Wængonguīmo ĩmopa. Īninqe botö, Nō cǎete mōnō quēwenguīnō ante nē waadebi inōmi inte bitö ēñēnāmaī nāni cǎinō ante edǎe wīi ainēmi ĩmipa.

Mānōmaī ĩmi ante adinque botö ĩmaī pōnō cǎebopa. Bitö tōnō godongāmǎe ongōnāni Awēnē badinque bitö watapǎe tocæbiimpa, ante cǎedinque botö, oginguipǎe pōnō gao caate baī nanguī cǎgaboimpa.”

¹⁰ Ante Mǎempo Wængonguī angacāimpa. Ayǎe adobaī tōmengǎ Wengǎ ingante apǎenedinque,

“Bitö Tǎiyǎe Awēnē inōmi inte wēēnēñedē pōnī inguipo mā cō cǎete baī cǎedinque tōmēmi badongabiimpa, angacāimpa.

Ayǎe öönǎedē ongoncoo adobaī tōmēmi bitö önompoca badongaincoo inte ongoncoopa.

¹¹ Mānincoo guiquēnē ĩncayǎe ate wido cǎete baī bayonte Bitö guiquēnē cōwē ongonguīmi ĩmipa.

Mānincoo guiquēnē mōnō weocoo pedǎncoo woincoo baī bayonte,

¹² waocǎ yacooque āninque topo cǎcǎ baī cǎedinque bitö wǎætē bitö badongaincoo ænte topo cǎete baī cǎcæbiimpa.

Wǎætē miincoo wēñacǎ baī cǎedinque bitö wǎætē tōmancoo miincoo badōmi ongongǎimpa.

Bitö iñōmō do bitö ingāi baī adobaī cōwē inguīmi ĩmipa.

Bitō quēwenguimāmo cōwē inguinō anguēnē.”

¹³ Äninqe Wængonguī tōmengä Wengä ingante iīmaī angacäimpa.

“Botō tōmēmæ inō tæ contate ongōñōmite,

botō bitō imite nē pūinte cædāni inānite bæ tabo tæ
wæænāni ate bitō tæi emōmi inte pīnä gāwate bai
godō cæbi wæcædānimpa,” angacäimpa.

Tōmengä Wengä ingante mänōmaīnō ante nē angaingä
inte Wængonguī dicæ anquedoidi inānite adobaī an-
gantawogaa. ¹⁴ Iñampa Wængonguī anquedoidi iññomō
baō omaadāni inte Wængonguī beyæ nē waa cædāni
inānipa. Mänōmaī iññōnānite tōmengä, Botō æmo
beyænque nē quēwēnāni beyæ mīnitō godō cæcæmīn-
impa, ante da pōnongä pōninqe tōmēnāni mōnō beyæ
pōnō waa cædānipa.

2

Wængonguī ængä beyænque quēwēmompā, ante

¹ Mänōmaī beyæ mōnō Awēnē apænecä ēñēninqe
mōnō ēñengainō ante mōnō ñimpo cædāmaī inguinque
ante mōnō wede pōnente ædæmō ēñente cæcæiimpa.

² Edæ anquedoidi incæ Wængonguī beyæ apæneyōnāni
tōmēnāni nāni änō ante dodāni wæætē nē ēñente
cæquēnēnāni ingadānimpa. Ininqe æcānō wīi ēñēn-
inqe wapiti cæda tōmengä nē tente wæquēnengä iñnon-
gante dodāni nō cædinque pangadānimpa.

³ Iñānāni ēñēedāni. Wængonguī nānō, Quēwencæmīn-
impa, ante angainō ante æcānō mōnō imonte tāno
apænecantawo, ante pōnēedāni. Wængonguī Awēnē
iñongä incæ tānocä apænegaingä inte, Botō tōmēmo æmo
beyænque quēwencæmīnimpa, ante apænegacäimpa.
Ayæ Wængonguī nānō apænegaīnō ēñente Ao āninqe
wadāni godōmenque mōnō imonte, Nāwangä impa, ante
apænedāni ēñēnimō inte mōnō ædæmō ēñengæiimpa.

Edæ ēñēnāmaī inte baī ñimpo cæmō ininque Wængonguī dicæ pānāmaī inte ata cæpocampa quēwenguimōō.

⁴ Īninque, Quēwencæmīnimpa, ante nāwangā botō ānō ante ēñencædānimpa, ante cædinque Wængonguī godōmenque cægacāimpa. Tōmengā, Æcānō tōnō cæquimoo, ante, Æyōmōnō cæquimoo, ante, Æyedēnō cæquimoo, ante nāmā nānō angainō baī cædinque iīmaī pōnō cægacāimpa. Tōmengā, Botō mā cæbo ate waodāni ēñencædānimpa, ante nanguī cægacāimpa. Ayæ, Æbānō cæcāā, ante wæcædānimpa, ante tæī pīñæninque wadō wadō cædinque bamōnengæ edæ nanguī cægacāimpa. Tōmengā Ōnōwoca ingante da pōnongā pōninque tōmengā wæætē Wængonguī nānō angaināni inānite pōnō cæcā æninque tōmēnāni tōmānāni Wængonguī Ōnōwoca nānō pōnongā ænganca cægadānimpa. Īninque Wængonguī mānōmaī pōnō cæcā adīmō incæ mōnō ēñēnāmaī cæmō baī tōmengā wæætē mōnō imonte ædō cæte ata cæpoquēnengāā.

Itota Codito tōmengā tōññadāni baī adobaī bagacāimpa

⁵ Ayæ miingui-poga Awēnē nempo mōnō quēwenguimāmo ante apænemōnipa. Īninque miingui-poga mōni ānongui-poga Wængonguī, Æcāmenque ingante āmo awēnē baquingā, ante cædinque, Anquedoidi incæ awēnēidi bacædānimpa, ante dicæ angantawogaa. ⁶ Wacā wataa yewæmōninque iīmaī ante Wængonguī ingante āmotamīni ante baī yewæmongacāimpa.

“Wængonguī ēñēmi. Waomōni ōnōmōnique iñōmōnite bitō ædō cæte waadete cæbii.

Wao wēmōni ēñagaimōni iñōmōnite bitō ædō cæte pōnō waadete cæbii.

⁷ Anquedoidi inānite æmonga ææntodōninque bitō waocā ingante gao wænō gō cæbi ate tōmengā wantæ iñō pōnōmenque ongongantapa.

Ayæ, Waocä nê täï emönongä inte ñäö emöñongante wadäni tömengä ingante waa acädänimpa, ante pönö badongabiimpa.

⁸Edæ bitö badongaincoo tömancoo waocä nempo pönömi æninque

waocä täï emongä inte nê angä bagacäimpa.”

Ante nänö yewæmongaine bai cædinque Wængongui tömengä nänö badongaincoo tömancoo Waocä nempo pönongä æninque Waocä nê angä bayongä wacoo wayömö ongoncoo edæ dæ ampa. Incæte, Tömengä nempo tömancoo do ongompa, ante mönö ñöwo ganca ayæ adämaï imompa. ⁹Doyedë mönö waocabo iñömönte Wængongui waadete pönö cædinque Itota ingante angä ëñëninque tömengä wæætë mönö tömämö wænguimämo beyæ ante cöwë wæwocate wæquiringä bagacäimpa. Mänömaï cædinque Wængongui anquedoidi inänite æmonga ææntodöninque, Itota wæætë caate wæncæcäimpa, ante cædinque tömengä ingante gao wænö iñömö gönongä ongongacäimpa. Incæte Itota caate wængä beyæ Wængongui poganta tæiyæ waëmö da wencate bai cædinque, Itota nê täï emönongä inte ñäö emongä adinque wadäni tömengä ingante waa acädänimpa, ante pönö cægacäimpa. Ìninque Itota Tæiyæ Awënë wencate ongongä ingante do amompa.

¹⁰Tömancoo nê badongaingä inongä inte Wængongui tömancoo nê enempodongä inte iïmaï angacäimpa. Botö Wëmi ëñëmi. Wadäni incæ botö wënäni nanguï inäni quëwencädänimpa, ante nê badömi bitö baquinque caate wæcæbiimpa. Mänömaï caate bitö wædö beyænque ædæmö picæmi bate nê ëñëniimi inte bitö botö wënäni inänite ñäö iñömö ænte mämömi poncädänimpa. Pöninque tömënäni botö ñäö emömo bai adobaï ñäö ëmoncädänimpa, ante Wængongui nö

pöni cægacäimpa. ¹¹ Itota mönō imonte, Tæiyæ waemō ewocate quëwencæminimpa, ante nē badongä iñongä mönō tömengä tönō adomō mönō cabo imompa. Mänō-maï imō beyæ tömengä mönō imonte ante apænedinque, Botō tönīñamīni iminipa, ante guiñenedāmaï tedecampa. ¹² İimaï ante apænecampa.

“Wængonguï eññemi. Bitō emōwo ante botō tönīñadāni inānite apænebo eññecädānimpa.

Tömēnāni godongāmæ ongonde eññönāni botō, Wængonguï iñömō Tæiyæ Waemō inongä inte waa pöni cæcä abopa, ante ämotamīni ante bai an-cæboimpa.”

¹³ Ayæ adobaï apænedinque,

“Wængonguï ingante botō wede pönente quëwencæboimpa,” angacäimpa.

Ayæ wæætē adobaï apænedinque,

“Wængonguï botō imote apænedinque, Bitō wēnāni, ante pönongä ænōmo inte botō, Möni wencabo mæ ongömōni aedāni, ämopa.”

Itota incæ Wængonguï beyæ nāni yewæmongainō bai adobaï apænecampa.

¹⁴ Mönō wænguimāmo ante wēnæ awēnē incæ nē angä iñongante Itota, Botō nāñe wæninqe tömengä ingante edæ ömæe ewencæboimpa, ante iimaï cægacäimpa. Mönō Itota wēñæmō inömō inte mönō baō tönō wepæ ñömænguïñō eñnamō bai tömengä nānō wænguinque adobaï ñömænguïñō eñagacäimpa. İinque tömengä nāmā nānō wænō beyænque wēnæ awēnē ingante bæ tacä ate tömengä wæætē piñænāmaï aquiï bate nē angä ināmaï ingampa. ¹⁵ Ayæ wēnæ awēnē nempo ñä cæyænte bai quëwēninque mönō wænguimāmo ante guiñente wæyōmonte Itota mönō beyæ ante wæætē wæninqe

mönö imonte gä pe æmpote ö ængä beyænque quëwë-mompa.

¹⁶ Edæ wii anquedoidi inänite ænte pæ mancæte ante cædinque tömengä wæætë Abadäo wodi päimö iñömonte mönö imonte pönö æninque pæ mangampa. ¹⁷ Mäninö beyæ Wængongui, Bitö tönĩñadäni bai adobai badinque bitö, Wængongui qui, ante nē nō Pönömi Ñænæmi pöni incæbiimpa. Ayæ bitö tönĩñadäni inänite cöwë pönëninque waadete pönö waa cædinque ædæmō aacæbiimpa, ante tömengä ingante da pönongä pongacäimpa. Ayæ adobai, Bitö tömënäni wënæ wënæ nāni cædö beyæ nāmā wepæ godoncæbiimpa, ante cædinque Wængongui Itota ingante da pönongä pöninque tömengä mönö ëñamö bai adobai ëñadinque waomö mönö inömö bai adobai badinque Waocä inongä ingacäimpa. ¹⁸ Mönö ingui-poga quëwëninque wënæ wënæ mönö cæinënö beyæ wæwëmompa. Wënæ awënë, Itota oda cædinque Wængongui ingante ëñënamāi cæcæcäimpa, ante cæyongä Itota iñömö mönö wæwënö bai adobai wæwengä incæte oda cædāmai ingacäimpa. İninque wënæ wënæ cæinente wæwëñömonte tömengä adobai do wægaingä inte, Minitö tæi piñante ongöninque oda cædāmai incæminimpa, ante pönö töö æmænte cæcampa.

3

Itota Ñænængä iñongä Möitee wodi wædangä ingacäimpa

¹ Mönitö imönite aa pedinque Wængongui mīnitö imīnite adobai aa pedinque, Tæiyæ waëmö entawencæminimpa, ante badongacäimpa. İninque botö tönĩñamīni ëñëedäni. Itota iñömö Wængongui nänö nē da pönongaingä ingacäimpa, ante mönö pönënö ante mönö, Nāwangä impa, ante apænemompa. Ayæ, Wængongui qui, ante nē Godongä Ñænængä pöni

iñömö Itota adocä ingampa, ante mönö pönönö ante, Näwangä impa, ante apænemompa. İninqe mīnitō guiquēnē, Itota æbänō ingacäimpa, ante öñöwēnenque pönente quēwenguēnēmīni imīnipa. ² Wængonguī angä ēñēninqe Möitee wodi guiquēnē tömengä ingante cöwē pönente cædinque Wængonguī tönö nāni godongämæ quēwencabo inänite ædæmō cæte aagacäimpa. Tömengä nö cæte nänö aagai bai adobai cædinque Itota iñömö Wængonguī angä ēñēninqe tömengä ingante cöwē pönente cædinque tömengä tönö mönö godongämæ quēwencabo imonte ædæmō cæte aacantapa.

³ Edæ, Oncö waa ongompa, ante waa amö incæ mönö oncö nē badöningä ingante godömenque waa ate apænecäimpa. Adobai, Möitee wodi nē waa aacä ingacäimpa, ante tömengä ingante waa amö incæ mönö edæ Itota nē badongaingä ingante godömenque nanguī waa ate apænecäimpa. ⁴ Waocä oncö guiquēnē wīi tömenque ongompa. Edæ waocä mænongä ate oncö edæ ongö aminipa. Inguipo incæ adobai öönæde ongoncoo adobai wīi tömenque ongoncoopa. Mänincoo tömancoo Wængonguī nänö badongaincooque ongoncoo acäimpa. ⁵ Möitee wodi guiquēnē Awēnē Wængonguī ingante nē cæcä inongä inte tömengä tönö nāni godongämæ quēwencabo inänite cöwē pönēninqe ædæmō cæte aagacäimpa. Mänömai cædinque tömengä, Wængonguī æbänö iincayæ ate apænequingää, ante odömöninqe, Näwangä impa, ante apænegacäimpa. ⁶ Mönö Codito guiquēnē Wæmpocä Wengä Onguīñangä inongä inte Wæmpocä tönö nāni godongämæ quēwencabo inänite cöwē pönente nöingä pönī cæte pönö aacampa. Edæ mönö guiquēnē, Codito waa pönī pönö cæcä beyænque watapæ bacäimpa, ante mönö pönönö ante wadāni ēñēñönāni waa tote apænemompa. İninqe mönö

guiñnāmaï inte mäninö mönö pönēnō ante ædæmō entawēninque iinque baganca ñimpo cædāmaï imō iinque tōmengā tōnō mönō godongāmæ quēwencabo imaimompa.

Wængonguï quīnāni nāni guēmanguimāmo ante

⁷ Mänōmaï beyæ Wængonguï Tæiyæ Waēmō Önōwoca nānō angainō ante mönō ēñente cæcæimpa. Tōmengā nānō apænegaïnō ante iimainō ante yewæmongatimpa.

“Ñōwoönæ incæ tōmengā apænecā ēñēninque,

⁸ mīnitō, Mīmō ömædē bawēnāmaï incæmōnimpa, ante cædinque Baa ānāmaï iedāni.

Dodāni iñōmō, Wido cæcæimpa, ante nāni önömæca quēwente cæyedē, Wængonguï ingampa diyæ panguingāā, ante pönēninque wiwa cægadānimpā. Mänōmaï cædinque tōmēnāni Baa ante mīmō ömædēnāni nāni bawengāi bai mīnitō adobāi bawēnāmaï iedāni.

⁹ Mīnitō mæmæidi māniñōmō quēwēninque botō imote wiwa cædāni wægaboimpa.

Incæte botō māniñedē coadenta wadepo iñonte waa cæbo agadānimpā.

¹⁰ Māniñedē quēwēnāni mänōmaï cædāni beyæ botō tōmēnāni inānite piinique iimāi angaboimpa.

‘Botō taadō goquēnēnāni incæ taadō cōwē adāmaï ināni inte

tōmēnāni ancaa oda cædinque mīmō ömædēnāni inte bai wadō godānipa.’

¹¹ Äninque botō ænguï badinque, Botō nē Quēwēmo ingaïmo inte nõingā ämopa, äninque,

Guēmædāni, ante botō angāiñōmō tōmēnāni cōwē guite guēmānāmaï incædānimpā, angaboimpa.”

Ante Wængonguï nānō angainō ante yewæmongadānimpā.

¹² Īñānāni ēñēedāni. Mini pōnencabo ĩñōmīnite mīnitō wacā ingā wacā ingā waa adinque adocanque incæ mīmō ōmædengā badāmaī incæcāimpa, ante wææ aaedāni. Ayæ adocanque incæ wēnæ wēnæ entawengā badinque wiya æmænte Wængonguī nē Quēwengā ingante ēmō cæte godāmaī incæcāimpa, ante wææ aaedāni. ¹³ Nōwoönæ, ante nē angā nānō angaiōnæ ĩñōmō ayæ ñōwo ganca ēönæpa. Īnīnque mīnitō ñōwoönæ incæ wacā ingā wacā ingā ædæmō apænedinque, Æcāmenque incæ wiwa nāni cædō beyænque oda cæte wædinque mīmō ōmædengā badāmaī incæcāimpa, ante cædinque ĩmō ĩñō ĩmō ĩñō godongāmæ ĩñacabo cædinque tæi ongōedāni. ¹⁴ Edæ mōnō wēenēñedē wede pōnengamōimpa. Nōwo adobaī pōnēninque ĩinque baganca wede pōnēmō ĩinque mōnō Codito nempo godongāmæ quēwēmaimompa.

¹⁵ Īnīnque adode ante pōnente cæcæimpa.

“Nōwoönæ incæ tōmengā apænecā ēñēninque mīnitō, Mōnitō mīmō ōmædēmōni bawēnāmaī incæmōn-
impa, ante wææ cædinque Baa ānāmaī ĩedāni.

Edæ dodāni, Wido cæcæimpa, ante cædinque edæ Baa
ante mīmō ōmædēnāni nāni bawengāi baī mīnitō
adobaī bawēnāmaī ĩedāni.”

¹⁶ Wængonguī angā ōnōmoncaque ēñēninque, Wido cæcæimpa, ante ædānidō cægadānii. Edæ Mōitee wodi Equitobæ nānō nē ænte gogāināni adodāni incæ, Wido cæcæimpa, ante cægadānimpa. ¹⁷ Ayæ adobaī Wængonguī coadenta wadepo ĩñonte ædānidō ĩnānite pīin-
inque ænguī bagacāi. Edæ nē ēñēnāmaī inte wēnæ
wēnæ cædāni ĩnānite Wængonguī pīinte ænguī bacā
ate tōmēnāni baō ingāi ōnōmæca yabæque wæænte
ōñongatimpa. ¹⁸ Ayæ, Pō guiite guēmāedāni, ante
botō angāñōmō cōwē guiite guēmānāmaī incædānimpa,
ante Wængonguī, Botō nē Quēwēmo ĩnōmo inte nōingā

angaboimpa, angacäimpa. Edæ ædänidö inänite mänö-maï angacäi. Edæ nē ēñēnämaï cædäni inänite mänö-maï angacäimpa. ¹⁹ İninque nē pönēnämaï inäni inte tömēnäni nāni pönēnämaï inö beyænque guidämaï ingadänimpa.

4

¹ Botö nempo guiidinque guëmancæminimpa, ante wēēñēdē nänö angainö ante Wængongui ñöwo incæ adodö ante cöwē angampa. Mänömaï beyæ mini pönencabo tømämïni tømengä nempo guiidinque guëmanguënemïni iñömïnite adocanque incæ oda cædämaï incæcäimpa, ante cædinque mönö godongämæ waa adinque wææ aacäimpa. ² Edæ dodäni inänite Wængongui ingantedö ante watapæ nāni apæneganö bai mönö imonte adobaï ante watapæ apænedäni ēñēmompä. Incæte dodäni guiquënë önömoncaque ēñēninque wede pönēnäni beyænque guëmänämaï inte wægadänimpa. ³ Mönö nē wede pönēmö imö guiquënë Wængongui nempo guiidinque mïmönē do guëmämompä. Edæ Wængongui nempo mönö guëmanguënēnö ante botö äninta adotaa iïmaïnö ante yewæmonte ongö bai batimpa.

“Botö ængui badinque, Botö nē Quëwëmo ingaïmo inte ämopa, äninque,

Pö guiite guëmædäni, ante botö angaiñömö tømēnäni cöwē guidämaï incädänimpa, angaboimpa.”

Ante Wængongui beyæ ante yewæmongadänimpa. Incæte doyedē inguipoga iï emönæ badöninque Wængongui tømengä nänö cæquënēnö ante iinque badöninque, Idæwaa, angacäimpa. ⁴ Wængongui önompo æmæmpoque go adoönæque iñonte iinque cædinque iïmö wæiyö nänö guëmangaiönæ ingatimpa, ante iïmaï ante wataa yewæmonte ongompa.

“Önompō æmæmpoꝥe go adoönæꝥe iñonte iinꝥe cædinꝥe iimō wæiyō ñimpo cædinꝥe Wængongui guëmangacäimpa.”

⁵ Ayæ botō äninta adotaa iimai ante yewæmonte on-gompa.

“Pō guite guëmædäni, ante botō äñömō tömënäni cöwë guidämaï incædänimpa,” angampa, ante yewæ-mongatimpa.

⁶ İinꝥe Wængongui nänō pönō cædō ante watapæ ante apænecä eñëninꝥe dodäni iñömō önömoncaꝥe eñënäni inte tömënäni nänäni eñënämaï cægainō beyæ guidämaï ingadänimpa. İinꝥe, Wængongui tömengä nänō angainō iinꝥe cæcæimpa, ante cædinꝥe iincayæ quëwënäni pancadäniya cöwë guiquënënäni inönänimpa. ⁷ Mänömaï beyæ, Æönædō eñgüenëmini imini, ante odömoncæte ante cædinꝥe Wængongui, “Ñöwoönæ,” ante awënë Dabii ingante wantæpiyæ ate apænecä eñengacäimpa. İinꝥe mäninō botō do ante yewæmömo mini adinō bai ante Dabii wodi iimaïnō ante yewæmongacäimpa.

“Ñöwoönæ incæ tömengä apænecä eñëninꝥe minitō, Mimō ömædëmōni bawënämaï incæmönimpa, ante cædinꝥe Baa änämaï iedäni,” ante yewæ-mongacäimpa.

⁸ Edæ docä Ootowee wodi tömënäni inänite doyedë manguicä guidinꝥe Cänäämæ quëwengadänimpa. Incæte tömënäni mänïömæ do guidinäni inte näwangä guëmänäni bai Wængongui iincayæ ate, Nöwoönæ guëmancæminimpa, ante wæætë änämaï incædongäimpa.

⁹ İinꝥe mönō Wængongui quimō iñömō edæ guëman-guïönæ guëmante bai mönō tömengä nempo quëwëninꝥe mimönë guëmäninꝥe cætawente wädämaï ingäimpa. ¹⁰ Wængongui iinꝥe badöninꝥe tömengä

nänö cæquēnēnō tōmäā cædinque ñimpo cædinque guē-mangacäimpa. Tömengä nänö ñimpo cæte guēmangai bai waocä iñömö Wængongui nempo guidingue nē guē-mangä iñömö adobai tömengä nänö cæquēnēnō ante, Tömänö do cætimpa, ante adinque ñimpo cædinque guē-mangampa. ¹¹ Dodäni nani ēñēnāmai cægai bai ñōwodäni adobai cädäni ininque tömēnāni nani tæ go wæen-guinque cæbainānipa. Mänömai i ininque, Adocanque incæ mänömai cæte tæ go wæenāmai incæcäimpa, ante wææ cædinque mönō tömämö, Wængongui nempo guiite mimönē guēmangäimpa, ante nangui cæcäimpa.

¹² Wængongui nänö änö iñömö miine quēwēne inte tæi piyänē ēnepa. Edæ yaēmē yægāmē tipængaa engamē bamencaa guibæ watii co bai Wængongui nänö änö iñömö adobai cædinque mönō önōwoca incæ do cote bai guiipa. Ayæ bamē tadömengadämē tæi guiñænte bamii edonque a bai Wængongui nänö änö iñömö adobai mönō mimö incæ tadömengadæ tæi guiñænte bai cædinque mönō pönēnō ante mönō cæinēnō ante do edonque ba adinque adode incæ apænte bai ampa. ¹³ Wængongui nē apænte äongä iñongante mönō nämä incæ, Æbänö cægamōnii, ante tömengä ingante töingä apænequēnēmö imompa. Edæ, Wængongui ayongä tömengä nänö badongaincoo tömancoo edæ gä ængate ömægacoo bai inte wodönāmai ongompa.

Wængongui ingante nē Godongä Ñænængä Itota ingampa

¹⁴ Mönö beyæ, Wængongui qui, ante nē Godongä Ñænængä pōni iñömö Wængongui Wengä Itota ingampa. Tömengä iñömö nämä wepæ godonte do wængaingä inte ñāni ömæmōninquē öönædē æite ongongampa. In-inque mönō, Tömengä ingante wede pönēmōnipa, ante nē apænemö inte mönō wede pönēnō ante ædæmō pæ mangäimpa. ¹⁵ Wængongui qui, ante mönō beyæ

nē Godongä Ñænængä pōni inongä iñömō wēnæ wēnæ cädāmai ingacäimpa. Incæte aquiñ imō inte wämō adinque tömengä wæætē, Botō Waobo ēñadinque aquiñ bate wægaïmo inte, Aquiñ mini wädō æbänō i, ante do edæ ēñēmopa, angampa. Edæ wēnæ awēnē tömengä ingante, Wēnæ wēnæ cæe, angä do wægaingä inte tömengä mönō wēnæ wēnæ cæinēnō, Æbänō i, ante do ēñengampa. ¹⁶ Ìninque mönō Awēnē iñömō nanguï waadete pönengä inte Awēnē containpaa ongongampa cämöö. Mönō wēnæ wēnæ cædinō ante tömengä pönō ñimpo cæcæcäimpa, ante cædinque mönō tömengä weca ponte apænecäimpa. Mönō caate wæyedē tömengä pönō töö æmænte cæcæcäimpa, ante mönō tömengä weca ponte apænecäimpa. Mänōmai Awēnē ongompaa gäänē pöninque mönō guiñēnāmai inte apænemō ēñēninque tömengä waadete pönō waa cæcä ængäimpa.

5

¹ Wængonguï qui, ante bitō botō imote nē pönōmi ñænæmi pōni bacæbiimpa, ante æcänō ingante Wængonguï angä bacää.

Edæ waocä adocanque ingante apænte æninque Wængonguï angä ate tömengä iñömō nē waocä inongä inte waodäni beyæ Wængonguï weca cæcampa. Ìninque waodäni iingä weca pöninque, Wængonguï qui, ante pædæ pönönäni æninque tömengä wæætē Wængonguï ingante godongampa. Ayæ, Wēnæ wēnæ cæmöni incæte Wængonguï waadete pönō ñimpo cæcæcäimpa, ante cædinque waodäni, Wængonguï qui, ante cæningä ænte pöninque pædæ pönönäni ængampa. Æninque nē godongä ñænængä iñömō nē waocä inongä incæte cæningä ingante ænte wænōninque nē ænte pönäni nani wēnæ wēnæ cædinō beyæ ante baö iya tangampa. ² Ìninque wadäni, Æbämē impa, ante ēñēnāmai nani wädō ante nē

godongä ñænængä iñömö nē waocä inongä inte adobaï pancaa ëñenämai inte wæcampa. Ayæ oda cæte nāni wædö ante tömengä adobaï oda cæte wæcampa. Ininque wadāni baï aquīngä inongä inte tömengä gänë pönëninque wadāni inānite ædæmō cæte odömongä adānipa. ³ Mänömai inongä inte tömengä wadāni wënæ wënæ nāni cædinö beyæ ante, Wængonguï qui, ante iya tāninque adobaï, Botö nāmā wënæ wënæ cædinö beyæ godömopa, ante iya tante Wængonguï ingante godongampa.

⁴ Waocä nāmā incæ, Botö, Wængonguï qui, ante nē godömo ñænæmo bayömote wadāni botö imote waa acædānimpa, ante ædö cæte anguingää. Iñæmpa Wængonguï angä beyænque Aadöö wodi nē godongä ñænængä bacä baï wadāni adobaï Wængonguï angä beyænque nē godönāni ñænænāni badānipa. ⁵ Codito incæ, Nē godömo ñænæmo badinque nē tæi ëmömo inte ñäö ëmömo acædānimpa, ante nāmā ante wīi angacäimpa. Wængonguï incæ tömengä ingante,
“Bitö botö Wëmi inömi imipa.

Ñöwoönæ bitö Wæmpobo babopa.”

⁶ Angacäimpa. Ayæ godömenque Wængonguï nänö angainö ante wataa yewæmongatimpa.

“Wængonguï qui, ante nē pönongä Mëequitedeco nänö cöwë ingaï baï,

bitö adobaï ñimpo cædāmai inte nē Pönömi cöwë incæbi-
impa,” ante Codito ingante angacäimpa.

⁷ Codito iñömö Waocä ëñate quëwëninque Ca ca wædinque Yæ yæ äninque Wængonguï ingante nanguï apænegacäimpa. Wængonguï bitö adobique eyepæ imi inte wææ ämi ininque botö wænāmai imaïmopa, angacäimpa. Incæte, Bitö, Wæe, ämi ate botö wæncæboimpa, ante nänö Ao äninö beyænque Wængonguï tömengä ingante

do eñengacäimpa. ⁸ Wæmpocä Wëñængä inongä incæte Itota nänö caate wæwëmämo beyænque Wængonguï nänö änö ante ædæmö eñente cædinque picængä bagacäimpa. ⁹ Tömengä nänö änö ante në eñente cædömö iñömonte tömengä ædæmö eñëninque picængä bagaingä inte edæ mönö imonte ængä beyænque mönö cöwë wænämaï inte quëwëmompa. ¹⁰ Tömengä ingante Wængonguï apænte æninque, Mëequitedeco në pönongä ñænængä pönï nänö ingaï baï bitö adobaï botö imote në Pönömi Nænæmi pönï inömi imipa, angacäimpa.

Mönö wede pönönö ante Baa änämaï ingäimpa, ante

¹¹ Mäninö ante botö mīnitö imīnite godömenque nanguï apænequënëmo imopa. Incæte, Æiquedö eñenguimīnii, ante pönente wædinque botö, Æbänö cæte apænebo eñenguimīnii, ante wæbopa. ¹² Iñæmpa mīnitö doyedë mīni eñengainö ante ñöwo në odömömīni baquënëmīni imīnipa. Incæte wacä wæætë mīnitö imīnite Wængonguï nänö angainö ante adodeque adodeque ante odömönte apænecä eñenguënëmīni adodö bamini awædö. Edæ wëñænäni në goömæ gänäni baï wæætë bamini iñöminite botö ædö cæte tæëmö cænguï godonte baï apænebo eñenguimīnii. ¹³ Goömæ në gangä baï ingä iñömö tömengä wëñængä baï iñongante mönitö, Æbänö nö cæquiï, ante odömönte apænemöni incæte tömengä iñömö cöwë eñënämaï ingampa. ¹⁴ Wæætë æcänö cöwë waa cæda ina iñömö tömengä, Quinö waa ii, ante, Quinö wænæ wænæ ii, ante wæætë wæætë ante cædinque do eñente badinque picængä baï bacampa. Ininque ædæmö picænäni në badäni beyænque möni nö odömönte apænedö iñömö cænguï tæëmö baï ongompa.

6

¹ Mönö Codito inguipoga quëwëninque æbänö cægacäi,

ante do ẽñẽmompã. Mõnõ wænguĩnõ goquinque wẽnæ wẽnæ cæmompã, ante wædinque, Idæwaa wẽnæ wẽnæ cætabopã, ante mõnõ Wængonguĩ gãmænõ æbãnõ cæte ocæ ẽmænte ponguĩ, ante do ẽñẽmompã. Tõmengã ingante æbãnõ cæte pønenguĩ, ante do ẽñẽmompã. Ìninqe mænĩnõ tõmãnõ ante do ẽñẽnimõ inte mõnõ mænĩnõ ante idæwaa tedetamompã. Wæætẽ, Æbãnõ cæte godõmenque picæmõ bai ẽñente baquĩ, ante mõnõ ñõwo apænecæĩmpã. ² Adobaĩ, Æpænẽ quĩnante guĩquĩ, ante, Ònompoca quĩnante godõ gampoquĩ, ante do ẽñẽmõ inte mõnõ mænĩnõ ante godõmenque tededãmaĩ ingæĩmpã. Ayæ, Wænte ate ñãni mõnõ õmæmongæĩmpã, ante do ẽñẽmõ ìninqe, Wængonguĩ cõwẽ apænte ancæcãĩmpã, ante do ẽñẽmõ ìninqe mõnõ mænĩnõ ante ñõwo godõmenque tededãmaĩ ingæĩmpã. ³ Ìninqe Wængonguĩ Ao angã ate botõ mænĩnõ mĩnitõ do ẽñẽninõ ante tededãmaĩ incæboĩmpã. Mĩnitõ ẽñẽnãmaĩ ìnĩnõ ante wæætẽ nangui apænebo ẽñencæmĩnĩmpã.

⁴ Wængonguĩ mõnõ mĩmõnẽ põnõ tica ẽnente bai cædinque edonque odõmonte apænecã ẽñẽninqe mõnõ ñãõ bai entawẽmompã. Tõmengã õõnædẽ waa põni nãnõ da põnongaincoo do ænte quẽwẽmompã. Ayæ tõmengã Tæiyæ Waẽmõ Ònõwoca ingante da põnongã æninqe mõnõ tõmengã tõnõ aãnque bai ẽwocamompã. Mãnõmaĩ ẽwocamõ incæte pancadãniya wadæ godãni inte edæ ædõ cæte, Wẽnæ wẽnæ cæte awædõ, ante ocæ ẽmænte ponguĩnãni. ⁵ Tõmẽnãni ìñõmõ, Wængonguĩ nãnõ ãnõ waa põni ĩmpã, ante do ẽñẽninãni inte ayæ, Wængonguĩ mĩnguĩpo nãnõ badõñedẽ mænĩñedẽ mĩĩmãmoque ba ate tæi pĩñænte cæcæĩmpã, ante do ẽñẽnãnipã. ⁶ Incæte mænĩnõ nãni wede põnẽninõ ante Baa ante wadæ godãni bai tõmẽnãni edæ ædõ cæte iĩncayæ ate, Idæwaa wẽnæ wẽnæ cæte awædõ, ante ocæ ẽmænte ponguĩnãni.

Īñæmpa dodāni Wængonguī Wengä ingante awæ timpote wænönāni bai cædinque iināni wæætē tōmengä ingante adodō wænonte bai cædānīpa. Ayæ tōmēnāni nāni æmæwo ewente wæquinque tōmānāni ayönāni Wængonguī Wengä ingante badete tote bai cædānīpa.

⁷ Edæ cōönæ wantæ wantæ cæ ate waodāni cōñe inguipoga tōmēmō quiyadāni wææ pæte incapa. Incate amimō ba ate nē quiyadināni nanguī tā pete eyepæ ænāni iinque Wængonguī wæætē onguipo tōmenguipo waa pæ ate adinque, Waa pæguipo abopa, angampa. Adobai tōmengä nānō änō ante wantæ wantæ iñō apænedāni ēñēninque waodāni gänē pönēnāni badinque wadāni iñānite waadete cædāni ate Wængonguī mänināni iñānite, Minitō waa ēñente cæmīni abopa, ante pönō waa cæcampa. ⁸ Ömentacooque pæguipo daacamenque pæguipo guiquēnē nānō æmæwo tante ewenguinque önunguipoque impa. Mäninguipo iya tanguī bai waocā adobai Wængonguī nānō änō ante nē Baa angä iñōmō tōmengä nānō æmæwo ewenguinque Baa angampa.

Watapæ bacæimpa, ante pönēninque tæi ongömompā

⁹ Īñānāni ēñēedāni. Wadāni mänōmaī iñānīpa, ante yewæmōmōni incæte mōnitō ayōmōni mīnitō wīi tōmēnāni bai imīni amōnīpa. Wæætē Codito ængä beyænque nē quēwenguimīni iñōmīni inte mīnitō cōwē waa cæmīni imīni amōnīpa. ¹⁰ Edæ mīnitō cōwē waa cædinque Wængonguī ingante waadete pönēninque tōmengä quīnāni beyæ godō waa cægaimīni inte ñowo godōmenque cæmīnīpa, ante adingä inte Wængonguī dicæ mīni cædō ante pönēnāmaī inguingää. Wæætē nē nō cædongä inte tōmengä mīni cædō ante cōwē pönengampa. ¹¹ Codito beyænque watapæ bacæimpa, ante mīnitō wede pönēmīnīpa. Īnīnque mīnitō mäninō mīni wede pönēnō ante iinque baganca wede pönencæte

ante cædinque mīni waadete pönö cægainö bai adobai iinque baganca cöwē cæedāni, ämönipa. ¹² Edæ nē wede pönēnāni wæntæye ināmaī ināni iñömö edæ Wængonguī, Pönömo äedāni, ante nānō angaincoo cöwē æncædānimpa. Mīnitö iñömö, Tömēnāni æbānō cædānii, ante adinque tömēnāni nāni cædö bai adobai cædinque wæntæye ināmaī inte Wængonguī nānō angaincoo adobai æncæminimpa, ämönipa.

¹³ Wængonguī, Botö änö bai cöwē cæcæboimpa, ante Abadäo wodi ingante angacäimpa. Mänömainö ante nāwangä impa, ante Abadäo ëñencæcäimpa, ante cædinque tömengä, Wacä ëmowo godömenque tæi piñængä ëmowo ante apænebo ëñëninque do ëñencæcäimpa, ante cæyongante wacä nē tæi piñængä guiquënë edæ dæ angacäimpa. Ininque Wængonguī iñömö nāmā ëmowo ante apænedinque, Wængonguimo nē Quëwëmo inte nöingä ante ämo ëñë, äninque iimaī angacäimpa. ¹⁴ “Botö bitö imite pönö waa cæbo ate bitö pæināni nanguī yebëninque bacoo bacædānimpa. Botö Wængonguimo nē Quëwëmo inte ämopa.” ¹⁵ Ante do angä ëñengaingä inte Abadäo wodi wantæpiyæ ænāmaī inte wänö cöñongante Wængonguī tömengä nānō angainö bai pönö cæcä ængacäimpa.

¹⁶ Waodāni guiquënë, Nāwangä ämopa, ante ëñencædānimpa, ante cædinque wacä ëmowo godömenque tæi piñængä ëmowo apænedinque änānipa. Mänömaī cædinque waocä, Botö godömenque nē tæi piñængä tönö guëa cæte bai änimo inte ædö cæte babæ ante wadö cæquimoo, ante bai apæneyongante wacä Ao angä ate tömēna nāna guëa cæcaya badapa.

¹⁷ Wængonguī iñömö, Botö wadö bai änāmaī inömo inte mänii botö angainö bai cöwē cæcæboimpa, angacäimpa. Ayæ, Mänömaī impa, ante botö angaincoo

nē ænguīnāni ædæmō ēñencædānimpa, ante cædinque Wængonguī nāmā ěmōwo apænedinque, Botō Wængonguimo nē Quēwēnōmo inte nāwangā āmopa, angacāimpa. ¹⁸ Tōmengā, Botō pōnō cæbo beyænque watapæ bacæimpa, ante nānō angāinō ante æncæte ante mōnō Wængonguī gāmænō do wodii wīnonte pōmōimpa. Īninque tōmengā weca do pōnimō iñōmonte tōmengā wæætē, Mēnea beyæ mōnō watapæ bacæimpa, angampa. Ayæ, Mīnitō wampo pōnēninque edæ botō tōnō edæ godōmenque cæcæmīnimpa, ante tōmengā ædæmō apænecampa. Mēnea ante apænebo ēñēedāni. Botō Wængonguimo iñōmo inte nāmā Wængonguī ěmōwo apænebo beyæ nē ēñēmīni inte mīnitō mānīne beyæ pōnencæmīnimpa. Ayæ godōmenque wade ante, Wængonguī incæ ædō cæte babæ wapiticæ anguingāā, ante pōnencæmīnimpa. Mānōmaī Wængonguī mēnea ante cægacāimpa.

¹⁹ Īninque wipo gæguīncamē inte tæi ñānoncadodāni ate wāi wocæ bai mōnō iñōmō edæ, Mānīne mēnea beyæ watapæ bacæimpa, ante mōnō wede pōnēnō beyæ tæi ongōmō inte mōnō ædō cæte wadæ goquīi. Mōnō wede pōnēnō beyænque edæ Wængonguī oncōnē weocoo wææ owoyōmo tadōmengadæncōnē guīi öönæde ñā cæte bai i ĩninque mōnō önōwoca iñōmō edæ tæi ongōnte bai ěwocamōmpa. ²⁰ Itota iñōmō tāno beyænte öönæde æidinque mōnō beyæ ante mānīncōnē do wāānē guīigacāimpa. Īninque Mēequitedeco nē godongā ñānængā nānō ingai bai badinque Itota, Wængonguī quī, ante nāmā wepæ nē Godongā Ñānængā pōnī inongā inte edæ cōwē ongongampa.

7

Mēequitedeco bai Itota nē Godongā Ñānængā ingampa

¹ Mëequitedeco guiquënë Tadëë nāni āñōmō quëwēnāni awënë odeye inongā inte tōmengā, Wængonguī Æibæ pōnī nē Quëwengā quī, ante nē godongā ingacāimpa. Īñongante Abadäö wodi wadāni awënë odeyeidi inānite wānonte pōñongante Mëequitedeco eyepæ pō bee tēninque, Abadäö ëñēmi, angantapa. Bitō ĩmite Wængonguī pōnō waa cæcæcāimpa. ² Ante pōnō waa apæneyongante Abadäö ĩñōmō awënëidi wodi nāni mangaincoo tōmengā nānō ò ænincoo bacoo pōnī incoo adinque ònompo tipæmpoga mānimpocato cabo tī gæte cō cædinque, Wængonguī quī, āninque Mëequitedeco ingante adocatoque pædæ godongā ængacāimpa.

Mëequitedeco nē awënë odeye ĩñongante tōmengā ëmōwo pemonte bai cædinque wadāni, “Awënë inongā inte tōmengā nē nō cæcā ingampa,” ante angadānimpa. Ayæ, Tadëë “Gänë pōnēñōmō” nāni angaiñōmō quëwēnāni awënë odeye ingampa, ante pōnēninque tōmēnāni, “Awënë odeye inongā inte tōmengā nē gänë pōnengā ingampa,” ante wawo pemongadānimpa. ³ Tōmengā badā ömaacā ingā bai, tōmengā wæmpocā ömaacā ingā bai, tōmengā nānō ëñagaiönæ ömaacā ingā bai, tōmengā nānō wængaiönæ ömaacā ingā bai ante dodāni tōmengā ingantedō ante yewæmongadānimpa. Mānōmaī ĩ ĩninque mōnō, Wængonguī Wengā nānō cōwē ingā bai Mëequitedeco adobai, Wængonguī quī, ante nē cōwē godongā ingampa, ante pōnengæimpa.

⁴ Tōmengā ñænængā pōnī ingacāimpa, ante botō ĩmaī ante apænebo pōnēedāni. Wængonguī quī, ante nē godongā ñænængā pōnī Mëequitedeco ingampa, ante pōnēninque mōnō wæmæ Abadäö wodi incæ tōmengā nānō ò ænincoo ònompo tipæmpoga mānimpocato ongō adinque adocatoque æninque Mëequit-

edeco ñænængä ingante pædæ godongä ængacäimpa. ⁵ Mönö Abadäo wodi pæimö iñömö tōmancabomö inömö incæte adocabodāniya mönō tōniñadāni Debiidi pancadāniya guiquēnē, Wængonguī quī, ante nē godōnāni bagadānimpa. Bayōnānite Mōitee wodi tōmēnāni inānite iīmaī angacäimpa. Mīnitō tōniñadāni inānite ämīni ēñēninquē tōmēnāni wæætē tōmēnāni nāni ænincoo önompo tipæmpoga mānimpocato ongö adinque adocatoque pædæ pōnōnāni æncæmīnimpa, ante wææ angä ēñēninquē tōmēnānique, Wængonguī quī bacäimpa, ante nē ænāni inānipa. ⁶ Mēequitedeco guiquēnē Debii wodi pæingä ināmaī ingaingä incæte adocatoque angä ēñēninquē Abadäo wodi pædæ godongä ængacäimpa. Do iñömö Wængonguī incæ Abadäo ingante apænedinque, Bitō quī, ante botō cōwē pōnōmō æncæbiimpa, angacäimpa. Incæte wantæpiyæ ate Wængonguī nānō nē angaingä iñongante Abadäo ingante apænedinque Mēequitedeco iñömö, Wængonguī bitō imite pōnō waa cæcæcäimpa, ante pōnō waa apænegacäimpa.

⁷ Mönö ayömö guiquēnē, Ñænænāni inōnāni iñömö tōmēnānique öñōnānique inānite nē godō waa apænedāni inānipa, ante do ēñēnimo inte mönō wadō ante ædō cæte pōnenguīi. Ininque, Abadäo wodi önonganque iñongante Mēequitedeco nē ñænængä inongä inte edæ mānōmaī waa apænegacäimpa, ante mönō edonque ēñēmompā. ⁸ Mānīnāni Debiidi guiquēnē nē ñōmæintai ēñadāni inānipa. Incæte tōmēnāni inānite wadāni, Wængonguī quī bacäimpa, ante adocatoque cōwē pōnōnāni ænānipa. Īngä Mēequitedeco guiquēnē ñōmæintai ēñadāmaī bai ingaingä inte nē quēwengä ingampa, ante yewæmongatimpa. Tōmengä mānōmaī nē quēwengä bai iñongante Abadäo wodi tōmengä ingante, Wængonguī quī, ante adocatoque godongä ængacäimpa.

⁹ Mänömaï impa, ante pönëninque botö, Eñencæminimpa, ante ñöwo godömenque yewæmömo aedäni. Tömënäni nãni æninö önompo tipæmpoga ganca mánimpocato ongö adinque, Wængonguï qui, ante adocatoque pædæ godöñönãni Debii nãni pæincabo incæ në ænäni inönänimpa. Incæte Debii wodi wæmpocoo ingainga inongä inte Abadäö wodi adocatoque do godongä ininque tömengä pæingä inguingä Debii inömö wæmpocoo tönö äanque bai adocatoque do godonte bai ayæ ate eñate quëwengacäimpa. ¹⁰ Edæ Abadäö wodi nänö pæinãni Debiidi inänipa. Ininque Debii ayæ eñadamaï inongante tömengä wæmpocoo Abadäö wodi ingante Mëequitedeco pö bee tente adocatoque æninque Debii nänö ænguënecoo incæ pancacooga adobai ængacäimpa.

¹¹ Wængonguï doyedë angä eñëninque Debiidi pancadäniya, Wængonguï qui, ante në godönãni bagadänimpa. Ayæ Wængonguï, İmaï cæedäni, ante angä eñente yewæmöninque Debiidi wæætë wadäni inänite odömönte apænedäni eñengadänimpa. Incæte Debiidi, Wængonguï qui, ante nãni godönö beyænque mönö Wængonguï ayongä mönö ædæmö pædäni bai edæ dicæ entawente bamongaa. Inæmpa mäninãni nãni godönö beyænque në picænãni bai bamö bai ñöwo wacä në Godongä ingante Wængonguï da pönönãmaï incædongäimpa. Ayæ, Wængonguï qui, ante në Pönongä incæcäimpa, ante Codito ingante da pönöninque Wængonguï, Debii wodi pæingä Aadöo nänö pönongaï bai Codito adobai pönoncæcäimpa, ante änãmaï inte wæætë, Mëequitedeco nänö pönongaï bai cædinque Codito pönongä beyænque woadäni botö ayömö në nö cædäni bacædänimpa, angacäimpa. ¹² Ayæ, Wængonguï qui, ante nãni godoncabo inönänite Wængonguï, Idæwaa cæminipa, äninque wacä ingante, Bitö

wæætē botō imote nē Pönömi bacæbiimpa, angacäimpa. Ayæ wacä mänömaï nē Godongä bacä beyæ Wængongui, İïmaï cæedäni, ante nänö wææ angainö ante wëä godonte bai cædinque wææ angä ingacäimpa.

¹³ İninque Wængongui ñöwo, Nē Pönömi bacæbiimpa, ante nänö nē angaingä İñömö Debiidi nani cabo inämaï inte wæætē wacabocä inongä ingampa. Incæte ñöwocä Codito guidänani İñömö, Wængongui qui, ante nani iya täimpaa cöwë godönämaï inönänimpa. ¹⁴ Edæ, Wængongui qui, ante oodaaidi nani cabo nē godönäni incädänimpa, ante Möitee wodi dicæ angacäiñaa. Incæte, Mönö Awënë İñömö Oodaa wodi päingä ingacäimpa, ante edonque acäimpa. ¹⁵ İninque Mëequitedeco nänö ingai bai wacä wæætē, Wængongui qui, ante nē Godongä bacä adimö inte mönö godömenque edonque ëñengäimpa.

¹⁶ Edæ Nöwocä tömengä mämæidi wii nē godönäni ingadänimpa. İninque, Bitö mämæidi nani godongai bai bitö adobai godonte ëñëe, ante ædö cæte anguii. Wii tömengä mämæidi nani cægai bai cædinque tömengä nē Godongä bagacäimpa. Wæætē cöwë nē wänämaï Quëwenguingä inte tömengä nämä nänö täi piñænö beyænque nē Godongä bagacäimpa. ¹⁷ Edæ tömengä ingante apænedinque Wængongui,

“Mëequitedeco, Wængongui qui, ante nē pönongä cöwë nänö ingai bai, bitö adobai ñimpo cädämaï inte nē Pönömi cöwë incæbiimpa,” ante apænegacäimpa.

¹⁸ İninque, İïmaï cæedäni, ante Möitee wodi wëenëñedë nänö wææ angaine incæ aquine inte önöneque bai İñonte wëä godonte bai bagatimpa. ¹⁹ Edæ Möitee wodi, İïmaï cæedäni, ante nänö wææ angainö ëñente beyænque mönö Wængongui ayongä ædæmö pædäni bai dicæ entawente baquimöo. Wængongui wæætē, Codito

pönö cæcä beyænque watapæ quëwencæminiipa, ante ñowo pönö apænegacäimpa. Ìninque, Mänömaï impa, ante pönëninque mönö Wængonguï weca pömompa.

²⁰ Wængonguï wïi önonque angacäimpa. Wæætë tömengä nämä ëmöwo apænedinque, Botö Wængonguïmo në Quëwënomo inte näwangä ämopa, äninque Codito ingante angä ate tömengä wæætë, Wængonguï qui, ante në Godongä bagacäimpa. Wæætë wadäni inänite guiquënë tömengä wïi nämä ëmöwo apænedinque, Näwangä ämopa, ante änämaï ingä incæte tömënäni önonque, Wængonguï qui, ante në godönäni bagadänimpa. ²¹ Codito ingante guiquënë Wængonguï iïmaï ante apænegacäimpa.

“Bitö ñimpo cædämaï inte, Wængonguï qui, ante në Pönömi cöwë incæbiimpa.

Ante botö në Tæiyæ Awënë inömo inte nöingä äninque iïncayæ ate wadö ante cöwë änämaï incæboimpa.”

²² Wængonguï, Itota botö imote në Pönongä inongä inte mïnitö beyæ cæcä ate mïnitö Ao ämïni ìninque mönö godongämæ waa cæcäimpa, äninque Wængonguï mönö imonte ñowo godömenque waa pönï apænegacäimpa. Ìninque Wængonguï mänömaï nämä ëmöwo apænedinque, Näwangä ämopa, äninque Itota nänö në angäingä iïngante mönö Itota ingante pönëninque, Wængonguï nänö angainö bai cöwë cæcæcäimpa, ante do ëñëmompa.

²³ Mäninäni guiquënë në ñömæintai ëñagainäni inte ædö cæte ñimpo cædämaï inte Wængonguï ingante në godönäni cöwë inguinänii. Ìninque wïi adocanque në godongä ingacäimpa. Wacä wacä në godönäni bagadänimpa. ²⁴ Itota iïnömö në wænämaï quëwënogä inte tömengä, Wængonguï qui, ante në Godongä inongä inte cöwë quëwengampa. ²⁵ Edæ tömengä në wænämaï Quëwënogä inte Wængonguï ingante mönö beyæ

Ebedeoidi 7:26 27 Ebedeoidi 7:28

ante cōwē apænedinque, Botō bitō gāmænō nē māmōmo pōnāni inānite bitō pōnō waa cæcæbiimpa, ante ñimpo cædāmaī inte cōwē apænecampa. Wængonguī ingante cōwē apænecā inongā inte tōmengā cōwē quēwēninque ædæmō pōnō ængā beyænque mōnō wæætē cōwē wænāmaī quēwenguimō imompa.

²⁶ Wadāni nāni ēñēnāmaī cæcabo baī wīi inongā inte Itota iñōmō tæiyæ waēmō inongā ingampa. Wentamō mongænāmaī inongā iñongante tōmengā ingante ædō cæte pīinte apænte anguīnāni. Mānōmaī ingā adinque Wængonguī tōmengā ingante öönædē æmonga pōni ængō cæcā ongongampa. Ìninqe tōmengā adocanque pōni, Wængonguī quī, ante nē nō Godongā Ñænægā pōni inongā inte mōnō wædō ante eyepæ pōni pōnō cæcampa.

²⁷ Wadāni nē godōnāni ñænænāni pōni ināni guiquēnē tōmēnāni tāno godōninque nāmā nāni wēnæ wēnæ cædō beyæ ante, Wængonguī botō imote waa acæcāimpa, ante cæningā wepæ iimō iñō iimō iñō godōnānipa. Ayæ ate wadāni nāni wēnæ wēnæ cædō beyæ adobaī godōnānipa. Itota guiquēnē wēnæ wēnæ nāni cædō baī cædāmaī inongā inte nāmā beyænque godōnāmaī ingacāimpa. Ayæ wamō mōnō wēnæ wēnæ cædō beyæ wæætē wæætē godōnāmaī inte tōmengā eyepæ inongā inte adopoque pōni godongacāimpa. Ìninqe tōmengā nāmā wepæ godōninque eyepæ pōni godongā adinque Wængonguī wæætē mōnō imonte waa acampa.

²⁸ Möitee wodi nānō wææ angainō ante ēñente cædinque waodāni aquīi ināni nāni cabo iñōnānite pancadāniya inānite ānāni Wængonguī ingante nē godōnāni ñænænāni do badānipa. Wængonguī guiquēnē iincayæ ate nāmā emōwo apænedinque, Botō Wengā ædæmō Picægā nē ēñengā bagaingā ingante āmo ate tōmengā nē Pōnongā Ñænægā bacæcāimpa. Botō Wængonguimo nē

Quëwënömo inte näwangä ämopa, angacäimpa.

8

Wængonguï ñöwo nänö angainö ante Itota iinque cæcä

¹ Mänömainö ante quïnante yewämömönii. Edæ, Mönö wædö beyæ ante, Wængonguï quï, ante nê Godongä Ñænængä pönï inte ongongampa, ante, Näwangä impa, ante edonque ëñencæminimpa, ante yewämömönipa. Tömengä iñömö öönædë æidinqwe Awënë Wængonguï tömëmængä inö tæ contadinque Tæiyæ Awënë inte ongongampa, ante yewämömöni adinqwe ëñencæminimpa.

² Mänömai inongä inte tömengä wii waocä nänö mænongaincönë cæcampa. Wæætë Wængonguï, Owocæboimpa, ante tæiyæ waëmö nänö mænongaincönë Itota iñömö mönö beyæ ante, Wængonguï quï, ante nê Godongä Ñænængä pönï inte cæcampa.

³ Inguipoga quëwënäni guiquënë adocanque ingante, Wængonguï quï, ante bitö nê godömi ñænæmi pönï bacæbiimpa, änäni badinqwe tömengä nê tä nê tä cædinqwe mäincoo cöwë godonguënengä ingampa. Iinque mäningä Itota guiquënë adobaï nê Godongä Ñænængä pönï inongä inte adobaï godonguënengä ingampa. ⁴ Edæ, Iincooque godoncæminimpa, ante Möitee wodi wææ angä ëñente cædinqwe inguipoga nê godönäni guiquënë do eyepæ pönï godönäni inänipa. Iinque tömënäni nani godö bai Itota iñömö ædö cæte godonguënengä inguingää. Inguipogaque quëwengä inte bai tömengä iñömö edæ Wængonguï ingante nê godongä inämai incædongäimpa.

⁵ Tömënäni guiquënë, Wængonguï öönædë nänö owocö cöwë ongö bai inguipoga adobaï mænonte mänincö öwocodenganque bai iñonte acæimpa, ante adobaï pönï mænongadänimpa. Mänömai mænöninque

tömənāni mǎnincōnenque, Wǎngonguī quī, ante nē godōnāni inte cǎdānīpa. Īnīnque Wǎngonguī, Adobaī pōnī mǎnōincō ongongǎīmpa, ante cǎdīnque Mōītee wodi nē mǎnonguingǎ ingante doyedē angacāīmpa. “Mōītee ēñēmi. Bitō, Æbānō mǎnonguīī, ante, Æbānō badonguīī, ante botō onquiyabo īñōmō bee tente odōmōmo adīnque badoncǎbiīmpa. Bitō cōwā adīnque botō odōmōnō baī īīncō adobaī mǎnōnīnque īīncōnē ongoncoo tōmancoo adobaī pōnī badoncǎbiīmpa,” angacāīmpa. ⁶ Wǎngonguī, Botō Mōītee tōnō wǎæ ānīnque, Īīmaī cǎedāni, āmo ate Ao āmīni īīnīnque mōnō godongāmǎ waa cǎete quēwengǎīmpa, ante wēēnēñedē nānō angāīnō wǎdǎenque waa ingatīmpa. Ñōwo guiquēnē tōmengǎ, Itota ængǎ beyænque quēwēmīni inte Ao āmīni īīnīnque mīīnitō botō tōnō godongāmǎ waa cǎete quēwencāmīnīmpa, ante nānō ānō īñōmō godōmenque waa pōnī īmpa. Edǎ Wǎngonguī nānō ānō īīnīnque bacāīmpa, ante Itota incǎ nō cǎgacāīmpa. Ayǎ adobaī mǎnīnō nē godōnāni nāni cǎdō guiquēnē wǎdǎenque waa īñonte Itota nānō nō cǎdō guiquēnē godōmenque waa pōnī īmpa.

⁷ Mǎnīne edǎ, Mōnō godongāmǎ waa cǎete quēwengǎīmpa, ante Wǎngonguī wēēnēñedē nānō angāīne īñōmō mōnō quēwenguīnō ante eyepǎ ī baī Wǎngonguī ñōwo wade ante ānāmaī incǎdongǎīmpa. ⁸ Incǎete waodāni wentamō mongǎenāni adīnque Wǎngonguī doyedē apǎnedīnque,

“Botō pōnō cǎbo ate mīīnitō Ao āmīni īīnīnque mōnō godongāmǎ waa cǎete quēwengǎīmpa,

Ante botō nē Awēnē īñōmo inte idǎgoidi īnānite oodaaidi īnānite īīncayǎ ate mīīne ante mā pōnī apǎnecǎboīmpa.

⁹ Mæmæidi doyedë Equitobæ quëwëñönänite botö töö æmænte ænte poncæte ante cædinque, tömënäni ïnänite, Mönö godongämæ waa cæcæimpa, äñömote tömënäni wæætë pango cæte gogadän-
impa.

Pango cæte godäni ate botö wæætë dadi ëmæmonte tömënäni ïnänite adämaï ingaboimpa.

Mänömaï beyæ botö wëenëñedë botö angaiñö baï ñowo wæætë adobainö ante änämaï incæboimpa, ante botö në Awënëmo ïnömo inte ämopa.

¹⁰ Mäniñedë ate edæ idægoidi ïnänite botö, ïïmaï pönö cæbo ate minitö Ao ämïni ïninque mönö godongämæ waa cæte quëwengæimpa, äninque edæ ïïmaï cæcæboimpa.

Ïïmaï cæedäni, ante botö wææ änö ante godö apænebo ëñëninque

mäniñe ante mïmönë yewæmonte baï entawëninque

tömënäni në wede pönënäni incædänimpa.

Tömëmo tömënäni Wængonguïmo ïñömote tömënäni wæætë botö quinäni incædänimpa.

¹¹ Mäniñedë botö angaiñedë ba ate edæ waocä tömengä guiidengä ingante

ayæ wacä ingante odömonte apænedinque,

Bitö Wængonguï ingante ate baï pönencæbiimpa, ante quinänte anguingää.

Ïñæmpa mäniñedë ate guiyanga pönï ïnogä incæ ñænængä pönï ïnogä incæ

tömënäni tömänäni botö ïmote do adinque pönencædän-
impa.

¹² Edæ tömënäni ëñënämaï näni cædö ante botö pänämaï inte waadete godö ñimpo cæcæboimpa.

Ayæ tömënäni wënæ wënæ näni cægäinö ante adämaï inte baï botö pönënämaï incæboimpa,” ante Wængonguï apænegacäimpa.

¹³ Äninqe ñöwo, Æmo beyænque quëwëmini inte mīnitö Ao ämīni īninqe mönö godongämä waa cæte quëwengäïmpa, ante mä pōnī äninqe Wængonguī wëenëñedë, ĩmaī cædāni, ante nānö wææ angaine ante, Woīne inte eyepä ĩnāmaī ingaine ënëpa, ante baī cæ-campa. Woīne ĩñömö oo dæ baquīne ënëpa.

9

Wængonguī Tæiyä Waëmö oncö baī æmontaicö impa

¹ Wængonguī wëenëñedë dodāni ĩnānite, Botö pōnö cæbo ate mīnitö Ao ämīni īninqe mönö godongämä waa cæte quëwengäïmpa, angacäïmpa. ĩninqe tōmengä nānö wææ angainö baī cædinque tōmënāni, Wængonguī ingampa, ante tōmengä beyä cæquënënāni ingadän-impā. Ayä inguipoga tōmengä owoquincö tæiyä waëmö oncö mäñnōninqe tōmengä weca pōninqe cæquënënāni ingadänimpā. ² Angä ëñëninqe dodāni, Wængonguī nānö owoquincö, ante æmontaicö badōninqe weocoo odemontai wodōnedinqe mencōnea badongadänimpā. Yabæcönë, Tæiyä Waëmö Oncö impa, ante nāni ancönë ĩñömö mäññömö gongapæncade doyæncade tæiyä tī wodōnoquī encadocade ongongatimpā. Ayä awæmpaa badōninqe tōmënāni, Wængonguī beyä tæiyä waëmö päö õngongäïmpa, ante cædinque mänimpaa päö ñö cædāni õngongatimpā.

³ Weocoo wacoo nāni guimongademö wodōññömö guimongacö ĩñömö Tæiyä Waëmoncö Pōnī nāni angaincö ingatimpā. ⁴ Mänincönë oguī wacäïmpa, ante cædinque, Oguī waquī iya tangäïmpa, ante awæmpa oodo nāni pōnö tee bæimpā badonte cö cædāni ongongatimpā. Ayä, Mönö godongämä waa cæcäïmpa, ante wææ äñ-inqe Wængonguī nānö yewæmongainca Tæiyä Waëmoncönë Pōnī ongongäïmpa, ante cædinque awæmpa

badöningue oodo yabæpa tee baadingue cæncadempa adobaï tee baate nāni cönöimpa ongongatimpa. Ayæ oodo æningue aca podonte wamoncade baï bædingue tōmēnāni önömæca nāni cængaimō Mānāā nāni angaimō æningue oodo nāni bædincadedē da wëningue mänin-
cade wæætē oodo emompaa cæncadē inō da wente cō cæte mangadānimpaa. Ayæ adobaï Aadöo wodi nānō ongonto tā bocagainto æningue ado oodo emompaa cæncadē inō da wente ñō cædāni õñongatimpa. Ayæ Wængonguï dicaboga nānō, ĩmaï cædāni, ante yewæmon-
gaïne adoyömō ongongæimpa, ante cædingue mäninca æningue ado oodo emompaa cæncadē inō da wëningue cō cædāni ongongatimpa.

⁵ Mänimpaa yædopaa waomīni mīni wënæ wënæ cædō beyæ wepæ godonte impa, ante Wængonguï, Botō pönō waadeimpa impapa, angacäimpa. Ayæ Wængonguï nē ñāō emongā weca nē owoda ĩñömō adobaï ñāō baï emōna ĩñonate tōmēna nāna emönō baï dodāni adobaï badonte oodo emompaa æmatæ æmatæ tæï goncædāni ongongatimpa. Ayæ tōmēna öömā tiyæmāa pömæna gänē ĩñömō Wængonguï, Botō pönō waadeimpa, ante nānō angaimpa õñongatimpa. Mänimpacoo æbānō impaa, ante mäninque ñōwo yewæmömönipa.

⁶ Tōmancoo mänömaï cōo cædāni ongõñonte, Wængonguï qui, ante nē godönānique ĩimō ĩñō ĩimō ĩñō yabæcönē pō guiddingue, Wængonguï ingampa, ante cægadānimpaa. ⁷ Guiimongacönē guiquënë nē godongā ñænængā ĩñömō wadepo ĩñō adopoque wadepo ĩñō adopoque pō guiddingue tōmengā adocanque guidongäimpa. Incæte tōmengā nē godongā ñænængā pōnī ĩnongā incæ wepæ næænāmaï inte ædō cæte guiquingā. Edæ wepæ cōwē ænte guiddingue tōmengā nāmā beyæ godō pipo pipo cædingue, Wadāni

ēñēnāmaī inte nāni wēnæ wēnæ cægainō incæ ñā mēnongacæimpa, ante tōmēnāni beyæ adobaī godō pipo pipo cædongäimpa. ⁸ Mānincō æmontaicō ayæ ongōñedē Tæiyæ Waēmoncōnē Pōnī wīī ōnonque guiigadānimpa. Wængonguī nānō owodō æidō māniñedē adobaī wīī edonque ingatimpa, ante odōmoncæte ante Wængonguī Tæiyæ Waēmō Ōnōwoca angā guidāmaī ingadānimpa.

⁹ Mānōmaīnō ante odōmōnque tōmengā mōnō ñō-womō imonte wæætē, ĩmaī ante ēñencæminimpa, ante cægacäimpa. Waocä, Wentamō mongænte awædō, ante nē wædongā inte waēmō ĩñōmō pōnque, Wængonguī quī, ante baō iya tanguī tōnō bequī cænguī godongampa. Mānōmaī ancaa godongā incæte tōmengā mīmō nāmā nānō apænte entawēnō ñā mēnongadāmaī inte wentamō ayæ mongænte entawēnongäimpa. ¹⁰ Mānōmaī cænguinque bequinque ante wææ ānque, Æbānō cæte godonguī, ante ayæ, Æpænenque æbānō cæte mēnongaquī, ante dodāni mānincooque ante nāni wææ angainō ante ēñente cægadānimpa. ĩnque, Waguipo ĩnque bayonte ōnōwoca ædæmō mēnongate quēwengäimpa, ante mīinguipo ĩnque bagancaque tōmēnāni mānincooque ante cædōnānimpa.

¹¹ Wapāmo mīni waa quēwenguinque pōmāmo, ante badoncæte ante mōnō Codito ĩñōmō, Wængonguī quī, ante nē Godongā Ñænængā pōnī ĩnongā inte do pongacäimpa. Pōnque tōmengā waodāni ōnompoca nāni mānongaincōnē guidāmaī inte Wængonguī nānō badongainguipoga cædāmaī ingacäimpa. Wæætē adodō go æidque tōmengā öönædē Wængonguī nānō owocōnē ñænæncōnē guidinque nāwā owocōnē cægacäimpa. ¹² Caboda wepæ næænte guidāmaī inte wagada wē wepæ næænte guidāmaī inte mōnō Codito ĩñōmō edæ nāmā wepæ godōnque öönædē Tæiyæ Waēmoncōnē Pōnī

æmæwo guigacäimpa. Ìninqe tömengä ängä beyænque mönö æmæwo pönì abæ tawænte bai cöwë quëwëmompä.

¹³ Ñömæi incæ gampodinqe, do wæningä baö incæ gampodinqe waocä näate bai wædongä inte edæ Wængonguï weca ædö cæte ponguingää. Wæætë, Tömengä waiñacä bate poncæcäimpa, ante cædinque, Wængonguï quï, ante nê godönäni iñömö caboda wepæ tönö wagada onguïñängä wepæ æninqe nê näadingä baonga pipo pipo cædänipa. Ayæ wagada baquecä ingante wænonte nê täninqe gönaique adobaï æninqe tömengä baonga pipo pipo cædinque, Bitö nê näadimi inte waiñabi babipa, ante cægadänimpa.

¹⁴ Mönö Codito guiquënë Tæiyæ Waëmö ìnongä inte nê cöwë Quëwengä Önöwoca tönö guëa cædinque Wængonguï ingante, Bitö quïmo ìmopa, ante nämä wepæ godongacäimpa. Tömengä wepæ iñömö wii cæningä wepæ bai inte godömenque eyepæ pönì wepæ ìmæmpä. Ìninqe mönö wænguinque wënæ wënæ cæyömonte tömengä, Minitö mïmö entawëmini inte ñä mënongate entawente nämä apænte pönente quëwencæminimpa, ante nämä wepæ do godongacäimpa. Ayæ mönö wënæ wënæ cægainö ante wadæ cædinque godömenque pönö cæcä ate mönö Wængonguï nê Quëwengä ingante nê cæmö badinque cæmompä.

¹⁵ Wængonguï mïine ante apænedinqe, Mönö godongämæ waa cæte quëwengäimpa, äñongante mönö waocabo wæætë ëñënamäi inte wënæ wënæ cæmö adinque Codito iñömö mönö wënæ wënæ cægainö beyæ ante wæætë wängä beyænque mönö abæ tawænte bai quëwëmompä. Nöwo iñömö Wængonguï mïine ante apænedinqe, Botö pönö cæbo ate mïnitö Ao ämïni ìninqe mïni ænguincoo æmæwo æninqe mïnitö cöwë mante quëwencæminimpa, ante aa pecä pongamönimpa. Ìninqe mönö Codito wæætë, Wængonguï nänö

angaincoo æncæminimpa, ante cædinque iinque cæcä ate mönö nê pönimö inte do ænte quëwëmompä.

¹⁶ Waocä, Näñe wämo adinque botö mäincoo ini iinänique æncæðänimpa, ante ëmöwo ëmöwo yewæmongä adinque wadäni wæætë, Näwangä æmäwo wængäimpa, ante ëñente ate, Nê wængaingä nänö ante yewæmongainö bai bacæimpa, ante iinque cæðänipa.

¹⁷ Ìñæmpä, Ìñäni qui bacæimpa, ante yewæmongä incæte nê yewæmönigä müingä quëwëñongante tömengä mäincoo ædö cæte tömëñäni qui baquii. Wæætë tömengä æmäwo wængä ate mäniñedë ate tömengä nänö yewæmongai bai iinque cæðänipa.

¹⁸ Mänömai beyæ wëñëñedë Wængongui, Mönö godongämæ waa cæcæimpa, ante yewæmongä ate dodäni cæningä wænonte ate wepæ gowete ate godongämæ Ao äninque iinque cægadänimpa. ¹⁹ Wængongui, Ìimai cæðäni, nänö wææ angainö tömanta adinque Möitee wodi iñömö tömänäni inänite apænecä ëñëñäni ate wepæ gowete ate cægacäimpa. Wagada wënäni wepæ tönö caboda wepæ æninque æpæ tönö ænte wempo cæðëninque iitopowæ näni äwæ yæpængö æninque obega ocagui opatawæmä näni guipæningui ænte pæ dacadinque wepæ näni wempo cæðënimænë bee podonte Möitee iñömö, Mäninta adinque ëñengäimpa, ante cæðinque mänintaa wepæ pipo pipo cægacäimpa. Ayæ nê ëñëñänäni tömänäni baonga wepæ pipo pipo cæðinque tömengä Ìimai angacäimpa. ²⁰ “Wængongui, Botö pönö ämo ëñëñinque minitö Ao ante ëñente cæmini iinque mönö godongämæ waa cæcæimpa, ante nänö wææ angainö beyænque ii wepæ impä. Ìininque ii wepæ ëmontaa adinque mönö Ao ante mäniñe ante ëñente cæcæimpa,” ante Möitee wodi apænecäimpa. ²¹ Ayæ æmontaiconga wepæ pipo pipo cædinque tömengä män-

incönë Wængongui beyä nãni cæincooga wepæ pipo pipo cægacäimpa. ²² Ayä wodo tömancooga ante Wængongui, Wepæ tönö ñã mënongacäimpa, äninque wææ angä cægadänimpa.

Îñæmpa wepæ gowedämaï iñonte mönö wënæ wënæ cæmö ädinque Wængongui nê panguënengä inte ædö cæte pönö ata cæpoqingää.

Codito wepæ beyænque mönö mimö mënongacäimpa

²³ Öönädë ongoncoo baï inguipoga nãni adobaï badongaincoo incæ cæningä wænonte ate wepæ tönö ñã mënongaquënëñãni ingadänimpa. Wæätë näwä öönädë Wængongui weca gote mönö ongonguinque mönö adocanique nê waëmö pönï inongä wepæ beyænque ñã mënongaquënëmö imompa. ²⁴ Edæ öönädë Wængongui nänö owocönë baï ante waodäni önompoca nãni tæiyä waëmö pönï badongaincönë mönö Codito guidämaï ingacäimpa. Wæätë öönädë incæ æidinque tömengä mönö beyä ante Wængongui weca guidinque a ongongampa.

²⁵ Wængongui qui, ante inguipoga nê godongä ñænængä pönï inongä guiquënë wii nämä wepæ ænte pöninque cæningä wepæ incæ ænte pöninque wadepo iñö adopoque wadepo iñö adopoque Tæiyä Waëmoncönë Pönï guicampa. Mönö Codito guiquënë inguipoga nê quëwengä baï wii adobaï inongä inte wii wæätë wæätë godoncæte ante öönädë æi guigacäimpa. Wæätë öönädë adopoque æi guidinque tömengä nämä wepæ adopoque godongacäimpa. ²⁶ Edæ inguipoga nê quëwënäni nãni cæi baï cæcä baï tömengä Wængongui inguipoga nänö badöñedë mä caate wædinque wantæ wantæ iñö cædinque ñöwo ganca tæmpo caate wæcædongäimpa. Wæätë mönö waocabo tömämö pedænguipoga mönö quëwënö wodo iinque bayonte tömengä ñöwo pönï adopoque pönï pöninque wënæ

wënæ mōnō cædō ante æmæwo wido cæcæte ante nāmā wepæ godongacäimpa.

²⁷ Mōnō waocabo guiquënë nē wænguimō iñōmo inte adopoque wænte ate Wængonguī weca pō gongæñō-monte tōmengä apænte ancæcäimpa. ²⁸ Mōnō waocabo nangui imō iñōmonte mōnō Codito iñōmō wënæ wënæ mōnō cædō ante mongæninque adopoque nāmā godōninque wængacäimpa. Ayæ wæætē pōninque tōmengä wīi mōnō wënæ wënæ cædō mongæncæte ante poncæcäimpa. Wæætē tōmengä nānō ponguinō ante nē wānō cōmō iñōmonte tōmengä, Quëwencæminimpa, ante mōnō imonte æncæte ante poncæcäimpa.

10

¹ Iñcayæ ate nē Ponguingä iñōmō, Wængonguī qui, ante nāmā wepæ eyepæ godoncæcäimpa, ante odōmoncæte ante cædinque Wængonguī, Iimaī cæte cæningä wepæ pōnōedāni, ante do wææ angacäimpa. Incæte māniī wepæ Wængonguī nānō wææ angaimæ iñōmō wīi eyepæ godongui ænguī impa. Iñinque mānimæ tōmengä nānō wææ angaimæ beyænque waocä ædō cæte ædæmō ëñente picængä bai baquingää. Iñæmpa idægoidi iñōmō wadepo iñō wadepo iñō wepæ ancaa godōninque Wængonguī weca pō ædæ wææninqe, Bitō Tæiyæ Waëmō imidō anguënë, ante apænecæte ante pōnāni incæte tōmēnāni tōmengä nānō wææ angainō beyænque picænāni bai dicæ badāniyaa. ² Tōmengä nānō wææ angainō eyepæ ī bai tōmēnāni adopoque godōninque idæwaa godoncædōnānimpa. Edæ, Wængonguī ingampa, ante nē cædāni iñōmō māninque godōninque ædæmō ñā mēnongate bacædōnānimpa. Ayæ iñcayæ ate tōmēnāni, Wentamō entawente wænguī wæ, ante nāmā apænte wædāmaī incædōnānimpa.

³ Edæ wii mänömaï impa. Wæætë, Botö wënæ wënæ cæte awædö, ante wæætë wæætë nāni pönente wæquinque tömënāni wædepo iñö wædepo iñö godönönānimpa. ⁴ Edæ, Möni wënæ wënæ cægäinö ante mënongacäimpa, ante godöñönāni wagada onguïñæ wepæ tönö caboda wepæ eyepæ imæmpa diyæ mënongauï.

⁵ Cæningä wepæ wii eyepæ impa, ante wædinque Codito ingui-poga pöningue iïmaï ante apænegacäimpa. “Wængonguï ëñëmi. Cæningä baö nāni wænonte pönönö tönö cænguï bequï nāni, Wængonguï quï, ante pönönö adinque bitö edæ wii æinëmi ingabiimpa. Wæætë botö Waobo baquinque bitö botö baö ante badongabiimpa.

⁶ Waodäni, Wængonguï quï, ante iya tāmöni ate Wængonguï waa acæcäimpa, ante täñönāni bitö wii tobi ingabiimpa. Tömënāni, Wënæ wënæ möni cædö ante Wængonguï pönö wido cæcæcäimpa, ante pönöñönānite bitö Baa angabiimpa.

⁷ Ante adinque botö, ‘Wængonguï ëñëmi. Dodäni botö imotedö ante yewæmöninque, Tömengä ingui-poga pöningue iïmaï cæcæcäimpa, ante nāni yewæmongäinö bai cædinque botö bitö änö ëñente cæcæte ante pöningue a ongömoï ae,’ antabopa,”

⁸ Möitee wodi guiquënë, Cænināni inānite wænöninque mīnitö, Wængonguï quï, ante pædæ godöninque cænguï tönö bequï godoncæmīnimpa, ante wææ angacäimpa. Incæte mönö Codito Mæmpocä ingante täno apænedinque, Waodäni cæningä nāni wænonte pönönö tönö cænguï bequï nāni, Wængonguï quï, ante pönönö adinque bitö wii æinëmi ingabiimpa. Wængonguï quï, ante iya tāmöni ate Wængonguï waa acæcäimpa, ante

ayæ, Wënæ wënæ möni cædö ante Wængongui pönö wido cæcæcäimpa, ante pönö täññöni bitö Baa ante wii tobi ingabiimpa, ante Codito apænecäimpa. ⁹ Ayæ, “Bitö äñö cæcæte ante pöninque a ongömoï ae,” angacäimpa. Äninqe tömengä, İine botö angainö iñömö ædæmö ëñenguine bate ongongäimpa, ante cædinque Möitee wodi wëñëñedë nänö angaine ante da godonte bai cægacäimpa. ¹⁰ Ayæ Wængongui nänö äñö ante në ëñente cæcä inte Itota Codito, Wængongui qui, ante baonga ëñadinque adopoque wæninque nämä wepæ eyepæ godongä beyænque mönö wæætë Wængongui ayongä täiyæ waëmö ewocamö bate quëwëmompä.

¹¹ Wængongui qui, ante në godönäni guiquënë tömänäni iimö iñö iimö iñö adiyæ gongænte Wængongui beyæ ante cædänipa. Mänömaï wæætë wæætë godöninque ado ado godönäni beyænque tömënäni wënæ wënæ näni cædö ante ædö cæte wido cæte baquii. ¹² Mäningä mönö beyæ në nö Godongaingä guiquënë adopoque godöninque iinque baganca eyepæ pöni godöninque Wængongui tömëmængä inö æi tä contate ongongampa. ¹³ Mänömaï ongöninque, Botö imote piinte cædäni inänite Wængongui æyedënö botö nempo pönongä æninque botö täi emömö inte në ämo baquimoo, ante Codito ñöwo ganca wänö congampa. ¹⁴ Edæ tömengä pönö badongä ate mönö täiyæ waëmö ewocate quëwëmö bayömonte tömengä adoque pöni nänö godongainö beyænque, Ædæmö picæmini bacæminimpa, ante do badongacäimpa. ¹⁵ Mäninö ante Wængongui Täiyæ Waëmö Önöwoca mönö imonte adobai apænecampa. Tömengä täno apænecäimpa.

¹⁶ “Mönö Awënë iimaï angacäimpa. Mänïñedë ate iincayæ ate,

botö pönö cæbo ate Ao änäni ininque mönö godongämæ
waa cæte quëwengäïmpa,

ante iinque cæcæte ante iïmaï cæcæboïmpa, angacäïmpa.

Botö pönö apænebo ëñëninque tömënäni, Iïmaï
cæedäni, ante botö wææ angainö incæ mïmönë
entawencædänïmpa.

Botö pönö apænebo ëñëninque mänïne ante ocai encate
ëñencædänïmpa.

¹⁷ Ayæ, Wënæ wënæ nänäni cædö ante ñïmpo cædinque botö
pönënämaï incæboïmpa. Ëñënämaï nänäni cædö
ante botö wæætë wæætë änämaï incæboïmpa,”
angampa.

¹⁸ Ininque tömengä pönö ñïmpo cæcä ate mönö edæ,
Wënæ wënæ mönö cædö beyæ pänämaï incæcäïmpa,
ante quïnante godömenque godonguï. Iñæmpa tömengä
dobæ ñïmpo cægacäïmpa.

Mönö Wængonguï weca pongäïmpa, ante

¹⁹ Iñänäni ëñëedäni. Tæiyæ Waëmö Pönï Oncönë
pö guiite baï mönö Itota wepæ beyænque guiñënä-
maï inte Wængonguï weca do guiquënëmö ïmompä.

²⁰ Weocoo mänincönë nänäni wææ cægaincoo wægo tē
baï Itota baö adobaï wangö cote ingatïmpa. Mänömaï
beyæ odemö miïnemö wi ænete baï i adinque mönö
quëwenguïnemö guïdinque Wængonguï weca edæ do
guiïmompä.

²¹ Wængonguï nänö godongämæ owocabo
iñömonte, Wængonguï quï, ante nē Godongä Nænængä
pönï inongä iñömö adocä Itota iñömö mönö ïmonte nē
aacä inongä ingampa.

²² Mänömaï beyæ mönö Wæn-
gonguï weca pö guicäïmpa. Wëenëñedë wentamö mönö
entawënö ante Itota nämä wepæ inte ñä mënongacä
ate mönö nämä apænte nö cæïnëmö inte guicäïmpa.
Ayæ mönö baö waëmömæ äate baï ëmömö ininque
mönö, Wængonguï tömengä nänö änö baï cöwë ædæmö

cæcæcäimpa, ante wede pönëninque mönō guĩñënämaĩ inte tömengä weca do guicæimpa. ²³ Botō cōwē pönō cæcæboimpa, ante nē angaingä ïñömō nē ædæmō cæcä ingampa, ante adinque mönō, Tömengä nänō änō baĩ cæcä beyænque watapæ bacæimpa, ante mönō pönëno ante cōwē wido cædämaĩ inte mönō pönengæimpa.

²⁴ Ayæ, Mönō pönencabo tömämō waadete pönëninque waa cæte quëwengæimpa, ante cæcæte ante pönente adinque mönō wacä ingä wacä ingä ïmaĩ godō cæcæimpa. ²⁵ Pancadäniya Wængonguĩ ingante godongämæ apænecæte ante pönämaĩ inte wadæ godäni incæte tömënäni nāni cæĩ baĩ mönō adobaĩ cædämaĩ ingæimpa. Wæætē, Codito nänō ponguïönæ oo pönĩ impa, ate pönente wædinque mönō pönencabo ïñömōnte mönō wacä ingä wacä ingä edæ waadete apænedinque, Wængonguĩ gämænō pöninque watapæ quëwëmiini incæminimpa, ante apænecæimpa.

²⁶ Wængonguĩ nō nänō änō ante do ëñënimō inte mönō, Wii ëñëinëwædō, äninque godömenque wënæ wënæ cæmō ïninque edæ wënæ wënæ mönō cædō ante mënongaquimæ ante edæ wepæ dæ ä baĩ babaimpa.

²⁷ Wæætē mänömaĩ ancaa ëñënämaĩ cæmō ïninque mönō Wængonguĩ nänō apænte ante panguimämoque ante guĩñente wæcömaimompa. Edæ mönō Baa ante godömenque wënæ wënæ cæmō ïninque Wængonguĩ ingante nē piināni nāni gonte wænguimämoque ante, Mönō adobaĩ gonte wæncæ wæ, ante guĩñente wæcömaimompa. ²⁸ Möitee wodi nänō wææ angainō ante, Wii ëñëinëwædō, ante adocanque nē angä ïñongante Waoda mënaa ïna incæ woadäni mengäa go adocanque ïnāni incæ, Mänömaĩnō ante apænecä ëñëntamönipa, ante apænedäni ëñëninque nē äningä ingante waadedämaĩ inte godō wænongadänimpa.

²⁹ ïninque adocanque Wængonguĩ Wengä ingante pinä

gäwate bai cædinque Baa angä adinque tömengä ingante Wængongui ædö cæte pänämaï inguingää. Wængongui, Botö pönö æmo ate minitö Ao ämini ininque mönö godongämæ waa cæte quëwengäïmpa, ante nänö angainö iinque bacäïmpa, ante cædinque Itota nämä wepæ inte mönö imonte ñä mënongacä beyæ tömengä ayongä tæiyæ waëmö ewocamö bagamöïmpa. Incæte adocanque Itota nänö nê ñä mënongadingä inongä inte, Itota wepæ wii waëmö i awædö, ante piingä adinque Wængongui ædö cæte apænte ante pänämaï inguingää. Ayæ Wængongui Önöwoca nê waadete pönö cædongä iñongante adocanque badete tocä adinque Wængongui tömengä ingante ædö cæte pänämaï inguingää. Edæ Möitee wodi nänö wææ angainö ante Baa änäni inänite wædænque päninque Wængongui iñäni inänite godömenque nanguï pönï pancæcäïmpa, ante pönëmiinyaa.

³⁰ Wængongui, “Botö tömëmo nê panguïmo imopa. Wiwa näni cædinö beyæ eyepæ pönï godö pämo wæcædänïmpa,” angacäïmpa. Ayæ, “Botö nê Awënë inömo inte botö quinäni inänite apænte ancæboïmpa,” angacäïmpa. Mönö iñömö, Mänömainö ante nê apænte pancæ angaingä ingante æbänö ingää, ante do ëñëmompä. ³¹ Edæ Wængongui nê Quëwengä inongä inte edæ ænguï badinque bæi ongonte pangä wæcæ wæ, ante mönö nanguï guñëñate wæcäïmpa.

³² Wëenëñedë Wængongui apænecä ëñëmini inte minitö tæcæ ñäö bai entawëmini ate wadäni pö piinte guëadö guëa cæyönäni minitö mini caate wæquinque tæi ongöninque godömenque cæmïnitapa. Mänömaï mini cædinö ante ñöwo pönëedäni. ³³ Pancayedëña iñömö nê piinte cædäni tömänäni ayönäni minitö iminite badete todinque pänänitapa. Pancayedëña guiquënë minitö tönïñadäni adobaï caate wæyönänite minitö, Ado-

cabomöni imönipa, ante bai cædinque nê caate wædäni tönö godongämæ ongömïnitapa. ³⁴ Wadäni inänite tee mönedäni adinque mïnitö tömënäni tee mönete näni wædö ante pönëninque tömënäni tönö godongämæ wæmïnitapa. Ayæ, Mönö mäincoo öönædê godömenque waa pönï ongoncoo inte cöwê ongongæimpa, ante ëñëmïni iñömïnite wadäni inguipoga mïnitö ëadincoo ö ænäni adinque mïnitö wædämaï inte watapæ tomïnitapa. ³⁵ Ininque, Mönö wede pönënö beyænque eyepæ pönï ænguimö imompa, ante ëñëninque mäninö mïni wede pönënö ante wido cædämaï iedäni. ³⁶ Ayæ, Wængonguï nänö änö ante ëñente cæmöni ate tömengä, Pönömo æncæmïnimpa, ante nänö angaincoo ante cöwê pönongä æncæmönimpa, ante cædinque mïnitö wæntædämaï inte ee cæquënëmïni imïnipa. ³⁷ Edæ Wængonguï beyæ ante do yewæmongatimpa.

“Wantæ wantæ ate nê Ponguingä mönö ämongä iñömö do poncæcäimpa.

Edæ tömengä nänö angaiönæ iinque bayonte tömengä eyepæ pönï poncæcäimpa.

³⁸ Nê nö cæte quëwëmongä incæ tömengä nänö wede pönënö beyænque quëwencæcäimpa.

Adocä wæætê guñente wædinque wodii winongä adinque,

botö tömengä ingante adinque wii tobaimopa,” ante Wængonguï beyæ yewæmongatimpa.

³⁹ Mönö guiquënë tömënäni näni cæi bai cædämaï inömö inte wii guñente wædömö inte wodii winönämaï imompa. Edæ wodii winonte bai mönö æmäwo ewente baquënëmö imompa. Wæætê edæ tömengä ængä beyænque mönö quëwënginque tömengä ingante wede pönëmö imompa.

11

Mönö wede pönönö ante

¹ Wængongui pönö cæcä ate watapæ bacæimpa, ante mönö pönönö ante mönö, Wængongui ayæ cædämaï ingä incæte cōwē cæquingä ingampa, ante wede pönēmompä. Awınca adämaï emömö incæ mönö mimöno wede pönëninque awınca do ate emonte bai ewocamö inte mönö, Näwangä bacæimpa, ante do eñemö imompä. ² Dodäni wede pönënäni iñönänite Wængongui, Mini wede pönönö beyænque botö minitö iminite waa abopa, ante apænegacäimpa.

³ Wængongui inguipo tönö iimönæ tömäo badoncæte ante cæyongä quiëmë impä ænte badonguingää. Iñæmpä dæ angatimpä. İninqe mönö nē acoo dæ añonte mänincoo ænämaï inte tömengä wæætë mä pönëninque angä beyænque mönö nē acoo do bagatimpä. Mänömaï ingatimpä, ante wede pönëninque mönö Ao ämompä.

*Dodäni näni wede pönengainö**Abedo wodi*

⁴ Abedo wodi iñömö Wængongui nänö angainö ante wede pönëninque, Wængongui qui, ante nö cæte godöninque Caïnö wodi wæætë önömonque nänö godönö bai wii godongacäimpa. Tömengä mänömaï wede pönente cæcä adinqe Wængongui, Abedo bitö nö cæte pönömi æmopa, ante apænegacäimpa. İninqe do wænte gogaingä inongä incæte Abedo wodi, Botö wede pönente cægaï bai adobaï wede pönente cæedäni, ante ñöwo ganca ayæ apænete bai apænecampa.

Ënoco wodi

⁵ Ënoco wodi guiquënë nē wede pönengä iñongante Wængongui, Ënoco eñëmi. Bitö botö nē waa adömi inte bitö wænguënëmämo ante wädämaï inte pöe, äninque

inque iñongante ö ænte wo ææntodongä æigacäimpa. Æite gocä ate wadäni ancaa diqui diqui mininque Wængonguï nänö në wo æntodongä ingante adämaï ingadän-
 impa. Edæ tömengä ingante Wængonguï ayæ ææntodönämaï iñongante wadäni, Ĕnoco wede pönengä in-
 gante Wængonguï waa acampa, ante do ëñënönänimpa.
⁶ Edæ Wængonguï weca poncæte ante cædinque waocä, Wængonguï në Quëwengä ingampa, ante wede pö-
 nguënegä ingampa. Ayæ adobaï, Wængonguï ingante
 në diqui diqui mïmö iñömonte tömengä, Pöe, äninque
 pönö waa cæcampa, ante wede pönëninque në poncæ
 cæcä pongampa. Mänömainö ante në wede pönënanique
 Wængonguï weca pönänipa. Mäninö ante në wede
 pönënämaï ingä guiquënë tömengä ingante Wængonguï
 ædö cæte waa aqingäa. Edæ waa adämaï ingampa.

Docä Nöwee wodi

⁷ Nöwee wodi Docä näni änongå guiquënë, Æbänö
 baquïi, ante adämaï iñongante Wængonguï, Nöwee
 ëñëmi. Bitö adämaï imämo oo pongæimpa cæbii. Angä
 ëñente guiñente wædinque në wede pönengä inte tö-
 mengä näni wencabo näni guiite quëwenguinque wipo
 ñænængade impo incæ ñænæ oncö baï badongä ate gui-
 ite quëwengadänimpa. Në wede pönënanique näni nö
 entawënö baï adobaï nö nänö entawenguinque Nöwee
 wodi wede pönente cægacäimpa. İninque tömengä ado-
 canque wede pönëninque mänömaï cædingä iñongante
 wadäni guiquënë näni apænte wænguinque Baa angadän-
 impa.

Abadäo wodi

⁸ Abadäo wodi guiquënë tömengä wede pönengä
 iñongante Wængonguï, Abadäo ëñëmi. Botö pönömo
 bitö ænguimæ ante botö odömömo goe. Angä ëñëninque,
 Æbæmë impa, ante adämaï inongä inte Abadäo wede

pönëninque ëñente cædinque do gogacäimpa. ⁹ Mänömaï wede pönëninque wadäni nëmæ gote wacä inongä inte wantæ iñö quëwengä bai inte æmontaicönë owogacäimpa. Ayæ Wængongui nänö angaimæ në ænguina inöna inte tömengä wengä Itæca wodi adobai tömengä wengä Aacobo wodi adobai wantæ iñö quëwente bai æmontaicönnenque owote quëwengadäimpa. ¹⁰ Wængongui doyedë pönï, Waodäni nani öönädë quëwenguiñömö ante botö iimaï badoncæboimpa, ante nämä nänö pönënö bai tæi gönonte mænongacäimpa. Abadäö iñömö, Botö mänii iñömö owocæboimpa, ante në wædongä inte wede pönëninque piyænë cædinque æmontaicönnenque owote inguipoga quëwengacäimpa.

¹¹ Mönö imonte pönëninque në ædæmö aacä inongä inte Wængongui iñömö tömengä nänö äninö bai cöwë cæcæcäimpa, ante në wede pönënä iñömö Tada wodi ingadäimpa. Mänömaï beyæ tömënä owæntadä iñönante Wængongui pönö cæcä æninque tömënä picængadedä inönä inte tæi piñæninque yædëmadä bate wëñængä mangadäimpa. ¹² Abadäö wodi wede pönëninque tæi piñænte tapæicä ate wëñængä ëñagacäimpa. Ininque adocanque picængadecä inte në wænte bai inongä inte wede pönengä beyænque mönö tömengä nänö pæimö yebæninque nëmoncoo öönädë owocoo nanguï pönï i bai mönö iñömö adobai nanguï pönï imompa. Æmönaicoo gäwapæ yæwedeca öñoncoo nanguï pönï i bai mönö tömengä pæimö imö adobai nanguï pönï iñömönte mönö, Mänimpomö imompa, ante ædö cæte anguii.

¹³ Mäninäni tömänäni wede pönente quëwënönäni inte wængadänimpa. Wængongui nänö, Pönö cæcæboimpa, angaincoo ayæ ænämaï inäni inte tömënäni gobæ ongoncoo gomö ate bai, Cöwë æncæmönimpa, ante wede pönente piyænë cæte quëwengadänimpa. Wadäni

nēmæ wabæca quēwente bai quēwēninquē tōmēnāni, Wīi mōnitō ōmæ iñōnte mōnitō wamōni inte quēwēmōnipa, ante inguipoga owogadānimpa. ¹⁴ Mānōmāinō ante nē ānāni iñōmō, Tōmēmōni ōmæ ante diqui diqui mēmōni imōnipa, ante quēwēnānipa. ¹⁵ Dodāni iñōmō do nāni ēmō cæte pongaīmæ ante pōnente wædāni inte bai tōmēnāni do adodō gocædōnānimpa. ¹⁶ Wæætē adodō māniōmæ nāni quēwengaiīmæ wīi goinēninquē tōmēnāni, Mōnō ōōnædē godōmenque wæmōmæ pōni gote quēwengæimpa, ante goinente wægadānimpa. Ininque wadāni Wængonguī ingante, Bitō nē wæmōmæ goinente wædāni tōmēnāni Wængonguīmi imipa cæbii, ante ānāni incæ tōmengā wæætē, Iñæmpa nē wædōnāni tōmēnāni quēwenguīñōmō nāni wædō ante botō do eyepæ mænongaboimpa, āninque guīñēnāmaī inte nanguī tocampā.

Abadäo tönö Itæca

¹⁷ Wængonguī, Abadäo æbānō botō imote ēñente cæquiringā, ante acæte ante angā ēñēninquē Abadäo wodi nē wede pōnēnongā inte tōmengā wengā Itæca ingante, Wængonguī quī, ante godongacāimpa. Edæ Abadäo ingante doyedē apænedinque Wængonguī, Bitō pæināni nanguī ināni inte iimæ æncædānimpa, ante do angā ēñengacāimpa. Incæte Wængonguī mānōmāinō angā ante nē ēñēningā incæ tōmengā wengā adocanque pōni inongā inte Abadäo, Wængonguī quingā ingampa, ante godoncæ cægacāimpa. ¹⁸ Adocā tōmengā wengā ingantedō ante Wængonguī doyedē Abadäo ingante apænedinque, Bitō wengā Itæca pæinānique inānitedō ante botō, Abadäo pæināni inānipa, angacāimpa. ¹⁹ Incæte Itæca wodi adocanque pōni iñongante Abadäo wodi, Botō wengā do wængā incæte Wængonguī, Ñāni ōmæmōe, angā ininque do ñāni ōmæmōmaingampa, ante wede pōnēn-

inque godoncæ cægacäimpa. Wængongui guiquënë, Ee æe, ante wææ angä beyænque tömengä wengä ingante wænönämaï ingacäimpa. Ìninue Itæca wodi do wæningä inte bai ñäni ömæmonte bai ayæ quëwengacäimpa.

Itæca, Aacobo, Ootee

²⁰ Itæca wodi adobai, Wængongui æbänö cæquiringä, ante wede nänö pönönö beyænque ëñëningä inte edæ picængadecä badinque Aacobo wodi tönö Etawoo wodi ìnate apænedinque, Wængongui minatö ìminate ìimai pönö waa cæcæcäimpa, ante waa apænegacäimpa.

²¹ Aacobo wodi ìñömö, Wængongui æbänö cæquiringä, ante wede nänö pönönö beyænque do ëñëningä inte wæncæ cæte öñöninque tömengä nänömoda Ootee wodi wëna ìnate, Minatö ìminate Wængongui pönö waa cæcæcäimpa, ante waa apænegacäimpa. Ayæ ongontoca da cæte ongonte ædæ wææninue, Wængongui bitö waëmö pönö ìnömi inte cæquimidö anguënë, ante watapæ apænegacäimpa.

²² Ootee wodi guiquënë, Wantæ ìñö wæncæboimpa, äninque, Mönö idægocabo mönö pæñäni incæ Equitobæ wantæpiyæ quëwëñäni ate Wængongui ænte mäocä wadæ gocædänimpa, ante tömengä nänö wede pönönö beyænque ëñëninque ìimai angacäimpa. Godinque botö bayetoca ingai ee ænte næænte godinque da wencæmïn-impä, angacäimpa.

Möitee wodi

²³ Möitee wodi mæmpoda guiquënë wëñængä ëñacä ate, Wïi önonganque ingampa. Waëmö wëñængä awädö, ante adinque ìimai cægadäimpa. Mäniñedë Equitobæ awënë odeye ìñömö, Onguiñængä ëñacä adinque do wænongäimpa, angä incæte tömëna guiñëñämaï inte tömëna wede näna pönönö beyænque wëñængä Möitee

ingante apäicä mengäa go adocanque mämonque wë wodonte mangadaimpa.

²⁴ Möitee wodi guiquënë picængä bayongante wadäni, Awënë Padaönö wengä wææ Möitee badä ingampa, ante Möitee ingante waa ayönäni tömengä wæætë Wængongui ingante në wede pönëongä inte edæ Baa angacäimpa. ²⁵ Wæætë edæ, Botö caate wæquinque botö Wængongui quinäni tönö godongämæ cæcæboimpa, ante cædinque Möitee wodi, Equitoidi näni wiwa cæte töinö adinque botö wantæ iñö incæ wiï toinente awædö, ante wido cægacäimpa. ²⁶ Wængongui iincayæ ate eyepæ pöni pönongä æncæboimpa, ante wede pönëninque tömengä mäninö ante mimöno gomö ate bai pönengacäimpa. Ayæ Equitobæ quëwënäni waëmoncoo pöni näni mäincoo ante adinque, Önoncooque ëwenguincooque i awædö, ante Möitee edæ Baa angacäimpa. Wæætë edæ piinte badete todäni wæcä incæte tömengä, Codito beyænque impa, ante pönëninque godömenque waa pöni togacäimpa.

²⁷ Tömengä iñömö, Awënë odeye Padaönö ængui badinque piingä wæcæ wæ, ante guïñente wädämaï inte wæætë wede pönëninque Equitobæ ëmö cæte gogacäimpa. Ayæ Wængongui në Quëwengä mönö awinca adämaï inongä ingante Möitee wodi iñömö në awinca gomö acä bai ëmongä inte wæntæye badämaï inte godömenque cægacäimpa. ²⁸ Ayæ, Bamoncadë ëñadäni inänite në ëwëngä incæ godö wænoncæcäimpa, ante Wængongui angä ëñëninque Möitee wodi wæætë, Në ëwëngä nänö wodo pænta goqui ingäimpa, ante wede pönëninque cægacäimpa. Tömengä wadäni idægoidi tönö Patowa æämæ mönö cämæ bai mä cængacäimpa. Ayæ, Në ëwëngä incæ mönö idægocabo bamoncadë ëñadäni inänite wænönämaï incæcäimpa, ante wææ cæcæte ante cædinque Möitee në wede pönëngä inte

wadäni tönö godongämä odemompaa wepæ öni paagacäimpa.

²⁹ Idægoidi guiquënë wede pönëninque gäwapæ Opatawämä näni ämæ goyæ go näë gongämä ate tæcæguedëmä pönï tao gogadänimpa. Equitoidi guiquënë, Taadö bapa, mönö taocäimpa, ante cæyönänite æpæmpo becadote wængadänimpa.

Adacaba wodi

³⁰ Idægoidi näni wede pönënö beyænque Eedicoo näni quëwëñmö yabæque näni wææ cægainca incæ näwæ cabænte wængatimpa. Edæ idægoidi önompo æmæmpoque go mëönaa mänimpoönæ iñonte yabæque godongämä cægonthe godäni ate cabænte wængatimpa.

³¹ Onquiyängä Adacaba iñömö mäincoo beyæ ante në towente në quëwengä inongä incæte tömengä wede nänö pönënö beyænque iïmaï cæte miingä quëwengacäimpa. Idægoda mënaa, Eedicoo iñömö æbänö quëwënänii, ante acæte ante awëmö pö guiida adinque Adacaba wodi, Ee pöeda, angä beyænque idægoidi wæætë ëñënämaï inäni inänite wænöninque tömengä ingante ata cæpodäni quëwengacäimpa.

Wadäni näni wede pönengäinö

³² Quinante godömenque ante apænequïmoo. Iinäni në wede pönënäni näni cægainö ante botö æiquedö apænequïmoo. Guedeönö wodi tönö Badaco wodi ingadaimpa. Ayæ wææ Tantö wodi tönö Yepetee wodi ingadaimpa. Ayæ wææ Awënë Dabii wodi tönö Tämoedo wodi ingadaimpa. Mäninäni tönö Wængonguï beyæ në apænegaïnäni wodi tömänäni wede näni pönënö beyænque iïmaï cædinque nanguï cægadänimpa.

³³ Në wede pönënäni iñömö täi ëmonte badinque wabæca awënë odeyeidi nempo quëwënäni inänite bæ

tadinqwe wido cægadänimpa. Pancadäniya wede pönëninque wadäni beyæ wææ äninque nö cægadänimpa. Wacä, Cæcæboimpa, äninque do cæquëngä incæ wii cæcä ïninque në pönënäni pancadäniya, Bitö änö cæcæbi-
 impa, änäni ëñëninque do cægacäimpa. Pancadäniya nänäni wede pönënö beyænque mëñeidi incæ ecadämaï ïnäni bagadänimpa. ³⁴ Gongga nanguï wo bæco ad-
 inque pancadäniya wede nänäni pönënö beyænque mönæ ëmongatimpa. Wadäni yaëmenca tamencacæ cädäni wædinque në pönënäni pancadäniya aamö cædinque miïnäni quëwengadänimpa. Aquii pöni ïninäni inte
 në wede pönënäni pancadäniya tæi piñænte bagadän-
 impa. Wabæca tontadoidi wænoncæ pönäni adinque në pönënäni pancadäniya wæetë tæi piñæninque wido cädäni gogadänimpa. ³⁵ Tömënäni guidënäni näñe wænäni ate onquiyænäni wede nänäni pönënö beyænque do wæninäni quëwënäni ate ængadänimpa.

Näni caate wægäinö

Ayæ adobaï në pönënäni ïnänite wiwa cädäni caate wæyönänite wacä, Ata cæpobo goquimi, angä incæte në caate wædönäni pancadäniya wæetë, Ee abi caate wæwëmoë, änänitapa. Tömënäni, Botö iincayæ ate ñäni ömæmöninque caate botö wædö beyænque godö-
 menque waa quëwencæboimpa, ante wææ äninque Ao änämaï ingadänimpa. ³⁶ Tömënäni nänäni wede pönënö beyæ pancadäniya ïnänite wadäni badete togadänimpa. Wadäni ïnänite wæetë tæi tæi pangadänimpa. Wadäni ïnänite wæetë yaëmengö ñä cæyæninque tee mönedäni wægadänimpa. ³⁷ Pancadäniya ïnänite dicaca tacadäni wængadänimpa. Pancadäniya ïnänite ta wiyænäni wængadänimpa. Pancadäniya ïnänite yaëmenca yedäni wængadänimpa. Pancadäniya obega æmontai tönö caboda æmontai badöninque mäninque wëñate mongæninque

ömæpodäni inte wæyönänite wadäni togænte päningue wiwa cægadänimpa. ³⁸ Tömënäni në wede pönënäni inte waa pöni inäni iñönänite inguipogaque quëwënäni wæætë wii tömënäni bai inäni inte wënæ wënæ cægadänimpa. Në pönënäni iñömö pancadäniya, Æyömömë gote quëwenguimoo, ante pönente wædinque wodii winonte önömæca wayömö godinque änanquidi wayömö godinque oncontatodë guidinque pancadäniya wë womöñönäni pancadäniya onguipodë ææ wote wë womongadänimpa.

³⁹ İninque Wængongui tömënäni inänite, Wede mini pönönö adinque botö waa tobopa, ante apænægacäimpa. Incæte tömengä nänö, Pönö waa cæcæboimpa, angainö ante tömënäni mäniñedë ayæ änämaï ingadänimpa.

⁴⁰ Edæ tömënäni adodänique wii æncädänimpa, angacäimpa. Wæætë Codito godömenque pönongä æninque mönö watapæ quëwëñömonte tömënäni mönö tönö godongämæ æninque ædämö picänäni bai bacädänimpa, ante Wængongui mönö imonte waa cædinque tömënäni beyæ adobai waa cægacäimpa.

12

Itota ingante mönö cöwë adinque quëwengäimpa, ante

¹ İninque boguimä bacoo owo bai mäninäni iñömö, Wængongui cöwë pönö cæcæcäimpa, ante në wede pönengainäni iñömö adobai bacoo ongönänipa. Edæ, Mönitö wede pönente möni cægai bai minitö adobai wede pönëninque iimaï cædäni, ante a ongonte bai apænedänipa cæmöö. Tömënäni quingæ pogodo gocæte ante cædäni teëmencoo gä äadäni bai cædinque mönö adobai oda caate mönö wædoncoo ante ñimpo cæcæimpa. Wënæ wënæ mönö cægaincoo ante, Ancaa cæte awädö, äninque mönö wido cæcæimpa. Ayæ taadö ante Itota

nänö odömongäinonque ante mönö edæ wæntædämaï inte tæï piñænique pogodo gocæimpa. ² Mönö wede pönente æite godö taadö ante tömengä iñömö në täno beyænte gogaingä ingampa. Tömengä adocä incæ mönö wede pönönö ante, Cöwë mänömaï bacæimpa, ante ædæmö badongaingä ingampa. Tömengä iñömö wadäni tömengä ingante awæ timpodäni wæyongante badete todäni adinque tömengä, Mänömaï cædäni botö caate wædö beyænque botö iïncayæ ate watapæ tocæboimpa, ante në ëñëningä inte piyænë cædinque caate wæd-
inque wængacäimpa. Tömengä ñöwo iñömö ñäni ömæ-
monte æite godinque Awënë Wængonguï nänö contain-
paa tömëmængä inö tæ contate Awënë bate ongöñongä mönö adocä Itota ingante æmö ate bai pönëninque edæ tömengä miñæ tee empote pogodo gocæimpa.

³ Tömengä iñömö në wiwa cædäni nanguï piïnte cædäni wæcä incæte piyænë cægacäimpa. Ìninque minitö iñömö, Wæntædämaï inte mímö nangæ batawënämaï ingæimpa, ante cædinque, Tömengä æbänö cægacäï, ante pönëedäni. ⁴ Ñöwo ganca minitö wënæ wënæ mïni cæinente wædö ante wido cæcæte ante minitö wænguï beyæ wepæ dicæ gowete cæmïniyaa. ⁵ Ayæ Wængonguï mönö wampo pönencæmöimpa, ante mönö ïmonte, Botö wëmïni godömenque cæcæminimpa, ante æbänö pönö angacäï, ante minitö dicæ pönëmïniyaa. Ìïmaï angacäimpa, ante yewæmongatimpa.

“Botö wëmi ëñëmi. Mönö Awënë bitö ïmite, Ëñente cæcæbiimpa, ante pangä wædinque,

bitö wæætë badete todämaï incæbiimpa.

Bitö ïmite, Ëñenguënë quëwëe, angä ëñente wædinque wæwënämaï incæbiimpa.

⁶ Ìñæmpa tömengä nänö në waadete pönënanique inänite päninque

mönö Awënë iñömö, Ëñencæminimpa, ante cæ-campa.

Botö wëmini, ante nänö nē ængainanique inänite tö-mengä pangampa.”

⁷ Ante yewæmongatimpa cæminii. Minitö caate wæmini iminitawo. Ìñæmpa wëñænäni inänite wæmpoidi dicæ pänämaï inguinäniyaa. Mæmpo Wængongui iñömö adobaï, Botö wëmini iminipa, ante edonque acæimpa, ante nanguï äninque pangä caate wæminipa. Ìninque tömengä pangä wædinque minitö wæætë, Mönö ëñente quëwenguinque ante Mæmpo Wængongui pangampa, ante piyænë cæte ee amini pancæcäimpa. ⁸ Tömengä wëñæmö iñömönte tömengä tömämö imonte edæ nanguï pante angampa. Incæte minitö pancaminiya iminute tömengä pante änämaï ingantawo. Ìninque minitö, Wii Wængongui wëmöni imönipa. Wacä wëmöni imönipa, ante wæquënëmini iminipa.

⁹ Mönö mæmpoidi waodanique inönäni inte nanguï äninque pänäni adinque mönö, Mæmpocä inongä inte tömengä nänö cæquënënonque cædinque mönö imonte waa cæte pangantapa, ante tömënäni inänite waa atamompa. Mönö Mæmpo Wængongui adobaï mönö imonte nanguï äninque pangä adinque mönö quëwenguinque mönö tömengä ingante godömenque Ao ante ëñente cæcäimpa. ¹⁰ Mönö mæmpoidi guiquënë, Æbänö pönö waa cæquimoo, ante pönente ate mönö imonte edæ, Ëñencæminimpa, ante wantæ iñö nanguï änäni ëñente cætamompa. Wængongui iñömö edæ, Tæiyæ waëmö botö ëwocabo baï minitö adobaï tæiyæ waëmö ëwocadinque watapæ quëwencæminimpa, ante cædinque mönö waa quëwenguinque ante pönö pangampa. ¹¹ Æcämenque mönö imonte nanguï äninque päna incæ tömengä pangä ate mönö caate wædinque dicæ quingæ watapæ tomon-gaa. Ìñæmpa, Caate awædü, ante cöwë ämompa. Wæætë

iincayä ate edæ doyedë nani pänö beyænque mönö në
 ëñente badömo ate mönö nö cæmö badinque gänë pö-
 nente entawëmompä.

Mönö wæquinque Wængongui apænecä ëñënamäi imompä

¹² Ìninque mìnitö guepænte wæðimìni inte edæ tæi
 pìñænìnque wæntæðämaï inte nanguï cæðäni. Önon-
 capo nanguï guecapote wæðimìni inte edæ guecapodä-
 maï inte ængä gantite pogodo gote baï nanguï cæðäni.

¹³ Mönö cægonguinö, ante mìnitö taadö ante enga womìni
 mäemö ba ate në podä cæðinäni incæ podä cæðämaï inte
 tömënanäni nani waa baquinque mäninönö töinö gote waa
 cægoncæðänimpä, ante godö waadete cæðäni.

¹⁴ Mönö godongämä piyænë cæte quëwengäimpä,
 ante mìnitö nanguï tæi pìñænìnque waodäni tömänäni
 inänite gänë pönente cæðäni. Ayä, Æcänö tæiyä
 waëmö ëwocadämaï ingää tömengä inömö mönö Awënë
 ingante cöwë adämaï incæcäimpä, ante pönente wæð-
 inque mìnitö, Mönö tömämö Wængongui ayongä tæiyä
 waëmö ëwocate quëwengäimpä, ante nanguï cæðäni.

¹⁵ Wængongui pönö waadete nänö cæðö ante mönö
 tömämö ænte entawengäimpä, ante cæðinque mìnitö
 cöwä adinque, Adocanque incæ ömætawengä inämaï in-
 cæcäimpä, ante wææ cæðäni. Adocanque wæwente
 nänö quëwënö beyä piinte bate tedecä ëñëninque mìnitö,
 Wadäni nani wentamö mongænginque adobaï piinte
 badämaï incæðänimpä, ante wææ cæðinque në piingä
 ingante godö wææ äedäni. ¹⁶ Ayä mìnì cabo incæ,
 Nänöogængä inämaï inongante adocanque incæ godö
 mönämaï incæcäimpä, ante cöwä adinque wææ cæðäni.

Etawoo wodi inömö tömengä bamoncadengä inongä
 inte nänö nanguï ænguënencoo ante piinte baï cæð-
 inque cænginque æncæte ante tömancoo godonte beyä

adopoque ænte cængacäimpa. Minitö guiquënë, Ingui-pogaque ante ænte to wædö, ante Etawoo wodi nänö pönëwente cægäinö bai adocanque incæ cædämaï incæcäimpa, ante edæ wææ cæedäni. ¹⁷ Bamoncadengä inte nänö ænguënencoo ante do püinte bai godöningä inte Etawoo wodi iincayæ ate, Pönömi æmoe, ãñongante mæmpocä wæætë Baa angacäimpa, ante do ëñëmïnipa. Edæ Ca ca wædinque tömengä, Æbänö cæte ænguïmoo, ante ancaa angä incæte mæmpocä do Baa äningä inte ñowo wæætë wadö ante ædö cæte anguingää.

¹⁸ Onquiyabo Wængonguï nänö gonga tänongä bæcobo ñænoque dodäni ponte godongämæ ongonte cægönäni bai minitö wïi onquiyabo ñænoque pömïnipa. Tömënäni wëmö mä mämonte bai iñömö wïni cai pæmæmämö iñömö näni ponte wægäiñömö bai minitö wïi pömïnipa. ¹⁹ Todompeta näni ancadeca nangui we öömämö dodäni näni ëñente wægäimämö bai minitö wïi adopämo ëñëmïnipa. Wængonguï wææ ante nänö tedepämo tömënäni näni ëñente wægäimämö bai minitö wïi adopämo ëñëmïnipa. Mänimämö ëñente guïñente wædinque tömënäni, Idæwaa ämipa. Ædö cæte godömenque ëñenguïmönii, ante wægadänimpa. ²⁰ Edæ “Cæningä incæ onquiyaboga ponte cægongä adinque minitö tæi tacamïni wæncæcäimpa,” ante wææ ãñongante tömënäni ancai guïñente wædinque, Wængonguï nänö wææ angäinö ante mönitö ædö cæte ædæmö ëñente cæquïmönii, ante wægadänimpa. ²¹ Onquiyaboga näni ate guïñëmämö adinque Möïtee wodi incæ, “Ancai guïñente botö do do wäate bai wæbopa,” angacäimpa.

²² Minitö guiquënë Tiönoquidi näni änonquidi do ponte bai ëwocamïnipa. Edæ Wængonguï në Quëwengä öönædë Eedotadëe bai nänö wæmö pönï owoyömö

mīnitō māniñōmō do ponte bai ēwocamīnipa. Wængonguī anquedoidi æpodō mīido ganca inōnāni inte nanguī pōni ināni godongāmæ pō bee tente tōmēnāni nāni watapæ ongōñōmō mīnitō māniñōmō do ponte bai ēwocamīnipa. ²³ Mōnō Codito ingante godongāmæ mōnō pōnencabo iñōmō bamoncadēnāni nē ænguimō bayōmonte mōnō emōwo ante oōnæde yewæmōintaa do yewæmonte ongompa. Inique mīnitō adocabomīni badinque Wængonguī weca mōnō waocabo tōmāmō imonte nē apænte anguingā weca do pōmīni imīnipa. Nē nō cæte quēwengaināni wænte goyōnānite Wængonguī iinque badongā ate do ædæmō picænāni bai badānipa. Tōmēnāni onōwoca weca mīnitō do ponte bai ēwocamīnipa. ²⁴ Wængonguī, Botō pōnō cæbo ate mīnitō Ao āmīni inique mōnō godongāmæ waa cæte quēwengæimpa, ante nānō angainō ante Itota, Inque bacæimpa, ante ædæmō badongacæimpa. Mīnitō iñōmō nē badongaingā weca do pōmīni imīnipa. Abedo wodi wepæ onguipoiya gowecā adinque Wængonguī wæætē nē wænōningā ingante, Botō weca ongōnāmai gobæwe, angacæimpa. Itota wepæ wīi Abedo wodi wepæ bai imæ adinque Wængonguī wæætē, Itota wepæ petæ petæ gowedimæ beyænque botō weca pōedāni, ante cægacæimpa. Mānimæ Itota wepæ nānō petæ petæ gowe-gaiñōmō mīnitō do ponte bai ēwocamīnipa.

²⁵ Mānōmai wæmō pōni iñōmō do pōmīni inte mīnitō nē apænecā ingante Baa ānāmai iedāni. Onquiyabo godongāmæ ongōnāni guiquēnē inguipoga wææ angaingā ingante Baa ānināni iñōnānite tōmengā ata cæpodāmai inte pangacæimpa cæmīnii. Oōnæde ongonte nē wææ angaingā ingante ēñēnāmai inte dadi emænte wadæ gomō bai mōnō godōmenque pante wæquēnēmō iñōmonte tōmengā cōwē ata cæpodāmai incæcæimpa.

²⁶ Mäniñedē tōmengä nänö tedepämo beyænque inguipo wancæ wancæ cægatimpa. Nõwo iñömö tōmengä, “Botö iñcayæ ate inguipo adopoque pōni wancæ wancæ cædinque öönæde adobaï wancæ wancæ edæ cæcæboimpa,” angacäimpa. ²⁷ Tōmengä, “Iñcayæ ate adopoque pōni cæcæboimpa,” angacäimpa, ante pönëninque mönö iïmaï ante ëñengæïmpa. Tōmengä adopoque wancæ wancæ cæcä ate tōmengä nänö badon-gaincoo oo pōni ongoncoo iñömö tōmancoo adoyedē ewente bacæïmpa. Quincodö oo ongönämaï täï ongoncoo i mänincooque ayæ a ongongæïmpa, ²⁸ Iñinque mönö Awënë Odeye nempo quëwëmö iñömö wancæ wancæ cædämaï inte täï ongonguimö imompa, ante pönëninque mönö Wængonguï ingante waa ate pönente apænecæïmpa. Mänömaï cædinque Wængonguï ñäö baï nänö täï ëmömämo ate guïñente wædinque tōmengä beyæ cæcæïmpa. ²⁹ Edæ mönö Wængonguï iñömö edæ gonga wo bæcoquï baï ingänö angüenë, ante ämo ëñë-maïmïnipa.

13

Iïmaï cæmö adinque Wængonguï waa tocæcäïmpa, ante

¹ Mïnitö iñömö, Mönö caipæ imompa, ante mïni waadete pönënö baï cædinque cöwë godongämæ waadete pönente cædäni. ² Tömänäni inänite edæ, Pöedäni, ante waadete cædäni. Mänömaï cædinque pancadäniya, Botö weca ædänidö ëñacæ pönänii, ante ëñënämaï inäni incæte do waa cædäni ate edæ, Æ, Wængonguï nänö da pönönäni anquedoidi incæ botö weca pönänitapa, ante tæcæ abopa, ante todänipa.

³ Tee mönete ongönäni tönö botö godongämæ tee mönete wæcömo baï imopa, ante pönëninque mïnitö tömënäni inänite ante cöwë pönëedäni. Pancadäniya

inänite wadäni wiwa godö cædäni ate caate wæwëñönäni mīnitö adobaī pönëninque, Mönö baö adobaī ëñamö inte tömënäni tönö godongämæ caate wæmö baī ïmompä, ante tömënäni inänite cöwë pönëedäni.

⁴ Nänöogængä inämaī ïñongante waocä nē godö guëa mongä tönö nē godö wiwa towënäni ïñönänite Wængonguī mäninäni tömänäni inänite do apænte ante pancæcäimpa cæmīnii. Mīna gæncaya adomīnaque guëa moncæmīnaimpa. Ayæ ñänönäni möninqe nāna gæncaya quëwëna ate, Waa impa, ante mönö waa acæimpa.

⁵ Wængonguī incæ, “Mīnitö ïmīnite cöwë ëmö cæte godämaī inte botö cöwë aacæboimpa,” angacäimpa. Mänömaī beyæ mīnitö godonte æinta ante æīnente wädämaī inte mīni ëadincooque ëadinqe piyænë cæte quëwëedäni. ⁶ ïninqe Wængonguī beyæ ïmaī ante nāni yewæmongainö baī ante mönö wede pönente apænemompä.

“Mönö Awënë botö tönö godongämæ cæcä adinqe botö, Waocä ædö cæte botö ïmote wënæ wënæ cæquingää, ante ëñëmo inte guīñënämaī incæboimpa.”

⁷ Nē aadäni ïñömö mīnitö ïmīnite Wængonguī nänö änö ante nē apænedäni inänite ante pönëninque mīnitö, Tömënäni ïñömö waa cædinqe edæ watapæ quëwënänipa, ante pönëedäni. Ayæ tömënäni nāni wede pönënö baī adobaī wede pönëedäni.

⁸ Itota Codito ïñömö wëenëñedë nänö ingaī baī ingä ñwoönæ adobaī ingä inte tömengä adocä iincayæ ate cöwë adobaī incæcäimpa.

⁹ Wadäni, Wacä taadö odömonte apænebo ëñëe, äñönänite tömënäni mīñæ godämaī ïedäni. ïñæmpä tömënäni cænguinque ante, Æbänö waa pönī cö cæquīī, ante wææ änäni incæte mänīī cænguincoo beyæ tömënäni wīī godömenque watapæ quëwënänipa.

Īninque mānincoo cænte beyæ mōnō mīmō ædō cæte tæi piñænte entawenguii. Wæætē edæ Wængongui nānō waadete pōnō cædō beyænque mōnō tæi piñænte entawengæimpa. ¹⁰ Æmontaicōnē cædinque, Wængongui qui, ante nē godōnāni iñōmō tōmēnāni nāni iya tāimpaa godōninque pancaa cængui ænte nē cænguēnēnāni iñōnāni incæte tōmēnāni mōnō Codito mōnō beyæ nāmā nānō wepæ godongainō guiquēnē ædō cæte ænguīnāni.

¹¹ Cænināni inānite wænōnāni ate nē godongā ñænængā pōni inongā iñōmō wepænque æninque, Wēnæ wēnæ mōni cædinō ante Wængongui pōnō ñā mēnongacæcāimpa, ante cædinque Tæiyæ Waēmō Pōni Oncōnē wāānē guiidinque godongampa. Godongā ate baonque, Wentamō mongænte awædō, ante æninque tōmēnāni nāni quēwēñōmō yabæque māo iya tangadānimpa. ¹² Itota adobaī, Botō wepæ pōnō mēnongabo ate botō quīmīni iñōmō tæiyæ waēmō ēwocate quēwencæmīnimpa, ante cædinque wentamō mōnō entawēnō ænte teēmē mongænte godinque tōmēnāni quēwēñōmō wææ cædinemō tao godinque yabæque pōni guīñēñate wædinque caate wængacāimpa cæmōō. ¹³ Tōmengā yabæque pōni guīñēñate wædinque nānō tao gogaī baī mōnō adoyōmō tōmengā weca tao gote ado guīñēñate wæcæimpa. ¹⁴ Īñæmpa inguipoga mōnō quēwēñōmō tæi ongompaa diyæ wantæpiyæ quēwenguii. Wæætē oōnædē iincayæ ate edæ mōnō cōwē quēwenguiñōmō ante æinente wædinque wānō cōmompaa.

¹⁵ Īninque, Wængongui qui, ante cængui godōnāni baī cædinque mōnō iñōmō edæ, Itota ēmōwo beyænque quēwēmōnipa, ante nē apænemō inte tōmengā ēmōwo ante Wængongui ingante apænedinque, Bitō tæi ēmōmi inte waa pōni cæbipa, ante watapæ apænecæimpa. ¹⁶ Ayæ

ñimpo cædāmaī inte mīnitō wadāni inānite cōwē waa cædāni. Ayæ wadāni inānite mīni mānincoo godō nēnempomīni æncædānimpa. Mīnitō mānōmaī, Wængonguī quī, ante godonte baī cædinque nēnempomīni adinque Wængonguī mīni godōnō ante waa acampa. ¹⁷ Mīnitō, Mōnō imonte nē ānāni inānite mōnō Ao ante ēñengæimpa, ante pōnēninque nē aadāni inānite cōwē ēñente cædāni. Tōmēnāni, Æbānō cæboo, ante adinque Wængonguī apænte ancæcāimpa, ante ēñēninque guīñente wædāni inte nō cædinque aadānipa cæmīni. Tōmēnāni mānōmaī aadinque watapæ tote quēwencædānimpa, ante mīnitō wæætē tōmēnāni nāni ānōnō ante ēñente cædāni. Mīnitō wæætē ēñēnāmaī imīni adinque tōmēnāni wæætē edæ, Ædō cæte aaquīmōnii, ante wæwente badāni ininque mīnitō adobaī todāmaī īmaīmīnipa.

¹⁸ Mōnitō beyæ ante Wængonguī ingante apæneedāni. Mōnitō mīmō entawēmōni inte wentamō entawēnāmaī imōnipa, ante nāmā apænte pōnēmōnipa. Edæ, Quiēmē cæmō incæ mōnō cōwē nō cæte quēwengæimpa, ante cæmōnipa. ¹⁹ Botō mīnitō weca ocæ ēmænte pōinēmopa. Ininque mīnitō Wængonguī ingante apænedinque, Wængonguī, bitō pōnō cæbi ate Pabodo mōnitō weca poncæcāimpa, ante apæneedāni, ante nanguī āmopa.

Mīnitō imīnite Wængonguī waa cæcæcāimpa, ante

²⁰ Wængonguī inguipoga nānō badōnāmaī īñedē wēēnēñedē pōni āninque edæ, Mōnō godongāmæ waa cæte quēwengæimpa, ante tōmengā nānō angainō baī cōwē nē badongāingā inte īmaī pōnō cægacāimpa. Edæ mōnō obegaidi baī īñōmonte Awēnē Itota īñōmō mōnō imonte nē Aacā ñænængā inongā inte tōmengā wepæ gowegaimæ eyepæ pōni godongā ate Wængonguī tōmengā ingante, Eyepæ ī, āninque, Ñāni ōmæmōe, angā ñāni ōmæmongacāimpa. Mānōmaī gānē pōnente nē

cægaingä inte Wængongui iñömö, ²¹ waa pöni pönongä ænte eyepæ entawëninque mīnitö iñömö tömengä nänö änö bai cæcæminimpa. Tömengä Itota Codito tönö godongämæ cædinque pönö cæcä æninque mönö tömengä nänö waa adoncooque entawengæimpa, ämopa. Itota Codito iñömö ñowopämo incæ iincayæmämo incæ cöwë nē tæi ëmönongä inte ñäö ëmongä amönipa, ante mönö tömengä ingante cöwë watapæ apæ necæimpa. Mänömaï ingæimpa, ante botö, Amëë, ämopa.

²² Iñänäni ëñëedäni. Botö mäninö tömänö ante apæ necæte ante wædænque pöni yewæmömopa. In-
 inque mäninö botö ædæmö apænedinö ante mīnitö piyænë cædinque ëñëedäni, ämopa. ²³ Mönö tönïñacä Tímoteo tee mönete wæyongante ñowo ñimpo cædäni gocantapa, ante apænebo ëñëedäni. Tömengä botö weca quingæ pongä ininque botö tömengä tönö guëa mīnitö weca ëñacæ pömaïmönapa. ²⁴ Mönitö beyæ apænedinque mīnitö imīnite nē aadäni inänite, Waa quëwencæminimpa, ante apæneedäni. Ayæ adobaï Wængongui quinäni tömänäni inänite, Waa quëwencæmin-
 impa, ante mönitö beyæ äedäni. Ayæ, Mīnitö imīnite ante apænedinque Itadiabæ quëwënäni adobaï, Mīnitö waa quëwencæminimpa, ante apænedänipa, ante ämo ëñëedäni. ²⁵ Mīnitö tömämini imīnite Wængongui pönö waadete cæcæcäimpa. Mäninque ante yewæmömopa.

Wængongui nänö Apänegainö
New Testament in Waorani (EC:auc:Waorani)

copyright © 2009 Wycliffe Bible Translators, Inc.

Language: Waorani

Translation by: Wycliffe Bible Translators, Inc.

Waorani [auc], Ecuador

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Waorani

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

